

宣德別錄



由國家圖書館數位化、典藏

宣德別錄卷二

江寧吳廷燮輯

宣德七年正月壬戌和寧王阿魯台來貢 甲子阿倫衛同知亦省哥等來貢 丁卯遣中官李貴等使哈烈等國敕諭哈烈沙哈盧鎖魯檀撒馬兒罕頭目兀魯曲列干卜露兒城達失干城沙魯海牙城賽藍城亦力把里討賚等處頭目 戊辰秦寧衛奏舊印爲本雅失里掠去請再給授從之 庚午敕緣邊諸將嚴謹兵備 乙亥鎮守山西都督僉事李謙奏虜寇竊入邊境官軍擊走之 丁丑賜朝鮮陪臣李藏毛憐衛僉事歹羊加等 遂安伯陳英卒 戊寅陝西行都司土官都督僉事李文奏昨西番阿吉族大國師托思把領占指揮同知星吉兒加言洪熙元年領本族喇麻阮丹汪東鎖南臧卜等隨李英至安定衛雅令闢之地討叛寇多所斬獲阮丹汪東鎖南臧卜之功當爲首而吒思把領不爲陳奏二

人不得與恚恨率所部亡入肅州鹽池境欲相仇殺今悔過復回  
居擺通州命所司升賞如例 庚辰勅劉廣瓦刺宜嚴備 壬午  
鄭亨發軍士三千五百赴長安嶺譚廣發軍四千赴赤城俱聽朱  
冕總督糧運給萬全炮五百 免思南府水德江長官司疫戶糧  
額 甲午特升安定同知果脫不花爲本衛指揮使官軍征曲先  
叛寇果脫不花爲向導 設廣寧苑開城縣境 丙戌命內官柴  
山賚勅往琉球令中山王巴尙志遣人齎往日本 戊子以新鄉  
縣吏郭瑄爲南陽府鴉路鎮巡檢 己丑重建大興平津閘修通  
州羊營閘橋 命指揮同知眞只罕掌阿端衛事指揮僉事卜答  
兒副之 阿端舊城乃回回之境去帖兒谷城尙一月程難於朝  
貢乞移置本土時西寧都督僉事史昭亦以爲言從其徙仍給衛  
印

二月庚寅朔鶴慶軍民府土官千夫長高英弟山等來朝貢馬 甲

錄

654.633

8896

v.2

午賜平涼衛指揮哈喇苦出所遣百戶李能等鈔幣有差 乙未  
四川平夷衛長官女土官王氏遣通事劉勝來朝貢馬 亥城衛  
女真舍人惱答來歸願居京自效 蕭授奏安隆長官司孫岑俊  
及頭目郎英聚衆攻圍慕叱寨同山雲委官撫諭今皆順服 丙  
申行在禮部侍郎章敞使安南還黎利遣使阮文綯等奉表隨敞  
等來朝謝恩 建州左衛土官都督僉事猛哥帖木兒遣弟都督  
僉事凡察等來朝貢 賜陝西文縣陽湯速尙等族番僧令占伯  
中尖等鈔幣 己亥順天府奏乞如應天府額取舉人八十人從  
之 謫監察御史王寶戍遼東 辛丑命安定王所遣指揮使果  
脫不花齋綵幣歸賜安定王亦攀丹 壬寅朝鮮遣柳殷之等來  
朝貢 播州草塘安撫司所屬穀撒等四十一寨蠻長個常徒等  
作亂聚衆二千餘人將攻牛場乾溪等堡敕陳懷遣人撫諭 癸  
卯施南宣撫司忠路長官司奏盤順峒長白墨杓聳爲仰墨施前



10110003

虎備等所殺下散毛納主峒土民驢拔送爲田大旺送等所殺命  
蕭授就擒治之 甲辰沙州衛都督因即來奏去歲旱災乞垂賑  
濟敕於肅州受糧五百石 丙午作大同沿邊屯堡軍士房舍  
丁未行在兵部奏遼東寧遠衛左千戶所以一百戶官軍煎鹽給  
軍食右千戶所以一百戶官軍炒鐵供軍器請鑄印頒給從之  
戊申命東寧衛千戶李款等齎敕往建州招諭 劉廣奏甘肅與  
西番北虜爲隣今赤斤蒙古衛韃人祖失加卜等三十四人以駝  
馬羊五百六十餘來歸若悉留在邊恐難防制諭行在兵部令於  
平涼涼州擇便地處之 庚戌復命工部右侍郎羅汝敬往陝西  
總督稅糧及芻粟出納河渠等事 行在戶部奏陝西邊衛折收  
米例每十分徵本色四分折色六分 其布絹絲綿折米之例每  
疋大綿布六斗小綿布四斗大絹一石二斗小絹七斗大三梭布  
一石五斗小三梭布七斗每生絲一石綿一石綿花絨二斗從之

辛亥雲南都司奏寧遠州土官知州刀吉罕比爲交賊所攻乞  
援勅沐昂察實 壬子建州左衛千戶住出等來朝貢 置萬全  
都司龍門衛經歷司守禦千戶所吏目各一 劉廣奏奉敕遣都  
指揮同知印鐸同西寧衛土官都督僉事李文往甘州白城招西  
番阿吉族番民七百餘帳還居野馬川今千戶他里巴言頭目朶  
里只領眞等六十餘人逃往赤斤俺官搬卜等三十餘帳逃往肅  
州仙人壩請仍敕李文招撫令廣移文諭之 甲寅設保德州守  
禦千戶所以鎮西振武雁門三衛帶管山西護衛官軍八百五十  
餘人實之 乙卯鎮守洮州衛都指揮使李達奏思曩日族番民  
盼吉捌爾節強掠本族人畜殺千戶捌爾結汪請治其罪 己未  
巡按貴州御史陳斌奏貴州所屬治古達意及湖廣所屬篁子坪  
梗化生番今又四出搶掠殺清浪衛守堡所鎮撫葉授勢益猖獗  
令蕭授差人撫諭

三月庚申南京戶部左侍郎郝鵬致仕鵬徐溝人 淮安府奏本府  
舊城東門路抵鹽城二百四十餘里今從南門急遞鋪過高郵州  
至鹽城則四百五十餘里請改鋪舍就近爲便從之 辛酉李達  
及火把等族國師班丹星吉等奏番民容少等一百九十餘人逃  
往生番思曩兒班班等族土官頭目潑隔處遣人追取不還又聚  
衆抗敵官軍敕松潘軍民指揮司及潑隔遣容少等還 方政奏  
獨石等處惟西貓兒峪未有城堡而當寇賊之衝已遣千戶楊洪  
領騎士屯駐且耕且守 遣內官昌盛等齎敕諭朝鮮國王李禔  
賜以紵絲紗羅錦帛令如永樂故事選牛一萬送遼東都司給軍  
仍遣員外郎李顯運絹布五萬正償其直 壬戌建州左衛都督  
僉事凡察以招撫遠夷歸附升都指揮僉事 水決固安縣馬莊  
等處隄岸 乙丑以西安中護衛公廨爲陝西都司治所以今治  
所仍爲西安左衛 丁卯調南京刑部左侍郎成均於南京戶部

九載考滿 戊辰陝西行都司土官都指揮李文遣百戶薛帖失  
加等洮州衛土官指揮同知蘇霖等來朝貢駝馬 庚午守西寧  
都督僉事史昭佩征西將軍印充總兵官鎮寧夏 守河州都督  
同知劉昭兼治西寧 行在禮部言哈烈所遣朝貢使將至京遣  
錦衣衛指揮鴉忽等迎勞之 蕭授奏治古達意等長官司新即  
等寨殘苗吳不爾等出沒清浪衛地方劫掠已令湖廣備禦都指  
揮張名領兵勦捕吳不爾等結生苗不登等及糾合鎮溪梢裏順  
苗賊衆攻劫五寨長官司民寨白厓等處 丙子設江西永新縣  
新安禾山二巡檢司各置巡檢一 己卯郭璉等奏衛所與府州  
縣隣者入府州縣學相遠者或一衛所或二三衛所各設一學以  
教訓學有成者聽赴本處鄉試從之 癸未鶴慶軍民府故土官  
知府高寶妻楊氏同其子倫來朝貢馬 甲申賜琉球使者漫泰  
來結束綵幣表裏綿有差 南京光祿寺留寺丞二典簿錄事各

一每署留官三員餘皆別用 乙酉貴州金筑安撫司頭目王眞等來朝貢馬 山雲奏斬獲桂平等縣蠻寇覃公專等首級之數 四月己丑姚暹河水決壞鹽池護隄鹽不結諭農隙發民 庚寅山東布政使按察使奏逃軍逃民多聚宜山爲盜時出搶掠敕特賜赦宥宜改悔前非各復舊業凡前逋負官物悉皆蠲免復業之後仍免稅糧及雜泛差役三年若不悛仍結聚作過官軍必至 辛卯貴州宣慰使安中來朝貢馬百四匹 新開白塔河工畢於江口添置巡檢司 乙未哈密忠順王卜答失里遣使臣兀馬兒火者等來朝貢 陳懷奏播州草塘安撫司所屬穀撤等十一寨蠻長官個常徒等皆招撫復業 辛丑免山西逋負稅糧二百四十五萬四千八百石 壬寅長河西魚通寧遠等處喇麻查朶番僧精密引占雜谷安撫司番僧計納臧汝奉州番僧温不容但監臧岳州長官司長官讓達等貢馬及方物 行在戶部奏重擬邊境

中鹽糧例 寧遠獨石肅州三處淮浙鹽每引米二斗五升河間  
長蘆鹽三斗山東河東福建四川廣東鹽俱一斗五升 宣府大  
同山海龍門甘州寧夏六處淮浙鹽每引三斗河間長蘆鹽三斗  
五升山東河東福建廣東四川鹽俱二斗從之 癸卯劉廣奏韃  
靼脫脫不花等既降復叛今在鐵門關西請發軍掩捕 哈烈使  
臣法虎兒等至京言至沙州被赤斤蒙古衛都指揮革古等劫殺  
敕都督因即來察之 丙午建州衛女真僧人綽失班來朝貢馬  
賜烏思藏僧容奴兒堅等綵幣表裏有差 迤北和寧王部屬  
弩溫帖木兒等來歸 戊申調赤城備禦都指揮僉事汪貴任萬  
全都司卞福專守獨石 己丑給監生有家室者月糧如南京例  
辛亥虜寇入朔州掠潞州運糧民牛總旂董成在朔州屯殺寇  
七人盡得所掠牛以歸 壬子行在都察院奏所擬巡撫侍郎與  
巡按御史按察使文移事例時吏部右侍郎趙新往江西江西按

察司謂非六部統屬承行詞訟多不回報咨行在禮部取明降顧  
佐上言內設監察御史外設按察司凡諸司不公不法皆得糾舉  
故與諸司無承行今趙新欲令按察司以問完詞訟回報慮御史  
按察司被其挾制曲法阿從乞勅禮部移文令新等凡有事務止  
行移布政司及府州縣轉行巡按使按司察行之若非切要重事  
不得一概徑行 癸丑瓦剌順寧王脫歡遣使臣福來奴等來朝  
貢馬 行在禮部言琉球船泊瑞安無館驛宜令工部移文浙江  
布政司於瑞安置公館及庫以貯貢物上曰俟農隙爲之 丙辰  
設行在錦衣衛馴象千戶所倉萬全都司龍門衛倉龍門守禦千  
戶所倉各置倉副使一員 江都縣潘家莊開江口開新開閘各  
置閘官一

五月癸亥敕巫凱廣寧開原馬市所買牝馬可送遼東苑馬寺孳牧  
牛以給屯種 泰寧衛韃官都督僉事脫火赤等遣指揮僉事哈

喇罕四川印部長官阿喬遣把事李阿得等來朝貢馬 甲子朶  
顏衛指揮使司差指揮都兒帖木兒奏永樂二年所降印信爲胡  
虜本雅失里掠去請再給賜從之 丙寅以松花江造船軍士多  
未還勅海西地面都指揮渾塔失納答野人指揮頭目葛郎哥納等  
曰此遣中官亦失哈等往覓奴兒干等處令都指揮劉清領軍松  
花江造船運糧令各官還朝而軍士未還者五百餘人即爲尋究  
遣人送遼東總兵官處 巫凱奏有軍卒二人逃往海西二十餘  
年誘引女真野人入寇今皆就獲請斬以徇從之 戊辰哈烈使  
臣虎兒丁卒行在禮部以聞命賜祭葬 辛未占城國王占巴的  
賴遣使臣逋沙怕麻托等貢方物 復開平涼府開城縣迭烈孫  
道路陝西參將楊善言西安諸府州歲運糧餉赴涼州甘州山丹  
永昌諸衛皆經平涼府隆德縣六盤山螯蜚嶺山澗陡絕人力艱  
難開城縣舊有路經迭烈孫黃河平坦徑直抵甘州諸衛近五百

餘里今請如舊開通以利民命布政使給官錢造八舟每舟十一人俱隸迭烈孫巡檢司 山東僉事李湯奏廣寧前屯衛及新設寧遠衛軍士缺食無牛耕乞運糧賑濟且乞哨守外免其餘差役時已命行在戶部於永平府運糧一萬石給寧遠廣寧二衛餘從所奏 壬申命忻州食鹽米皆折鈔 丙子交趾土官百戶陳宗復言黎利倡亂臣棄墳墓遣親戚隨諸將歸朝廷今有司概送河南俾之就閒伏望止留在京以勸天下臣子之忠義命留凡復同宗復內附者皆留京 丁丑朱勇等議以延安慶陽平涼鞏昌四衛及西安前後左衛官軍戍寧夏 漢中鳳翔金州三衛皆遣還於寧夏中護衛撥補總一萬一千七百餘人以寧羌蘭州臨洮鞏昌山丹永昌涼州莊浪及甘州左右中前後五衛官軍戍甘州通計九千八百七十餘人肅州鎮番西寧秦州衛禮店千戶所去甘州遠者皆遣還從之 辛巳亦力把里歪思王遣使臣也力迷失

土迷秃等貢馬及玉石礪砂等方物 壬午下會寧伯李英等錦衣衛獄 癸未福餘衛韃官指揮僉事阿失答木兒等來朝貢馬初歸附 丙戌朱勇奏萬全都司所轄地方洗馬嶺長安嶺黑峪口并宣府官軍月糧宜令於本處附近支從之 鄭亨奏山陰馬邑二縣實虞寇必至之地請修築二城各置千戶所從之 又口聚鸞高山口外要衝之地請築二城設二衛不聽

六月戊子占城國副使逋沙怕被刺卒遣官賜祭命有司備斂葬

蘇州府知府況鍾言長洲等七縣舊有民三十六萬餘戶稅糧二百七十七萬九千餘石其中民糧止一十五萬三千一百七十餘石官糧二百六十二萬五千九百三十餘石官田每畝科糧不等自五斗至三石洪武間徵各縣民有民糧者出馬二百餘匹役於濠梁等驛又出丁船役於水驛及遞運所永樂間北方民飢徵本府民有民糧者出馬二百四十餘匹役於銅城等處約至三年仍

令土民代還因有民糧者不足又以有官糧者補之至今三十餘年未曾更代民實困苦又言近徵闕三梭布八百疋浙江十有一府民糧二百六十餘萬所出不過百疋蘇州一府獨七百疋其餘徵科不均往往類此乞繼今凡有科徵或以民糧或以戶口爲度庶幾多寡適均公務易集人民可甦從之 己丑辰州河蓬彪金等寨蠻寇向擺婆等與白鋸腦等殺人劫財命蕭授出兵勦之多所斬馘鋸腦遁遂擒擺婆等授撫安餘黨而械擺婆等至京師命下錦衣衛獄初河蓬彪金等寨無所統屬故縱恣犯法至是命隸永順宣慰司 辛卯南京工部尙書甄庸致仕 壬辰郭資考滿賜宴賜敕勞 琉球遣使臣南者結制等來朝貢馬 丙申右通政徐琦南京兵部右侍郎 己亥益洗馬嶺守備兵 行在兵部奏居庸關外自荊子村黑峪口至長安嶺北抵獨石接龍門關西抵天成諸煙墩隘口雖有守備未經點閱請一體遣官巡視從之

行在兵部尙書許廓卒

字文超襄城國子生

壬寅敕劉廣等

凡外蕃入貢之人及往回回須防閑周密勿縱於他處往來 甲

辰改築東安門外黃牆于河東 乙巳敕行在部院今聞諸司官

吏仍有不體朕恤民之心恣意擅爲復業之民來歸未久居無廬

舍耕無穀種逼其補納逋租賠償倒死孳生馬騾牛羊科迫諸色

顏料荼毒不勝其速行諸司厚加撫恤復業之民不許一毫攪擾

仍依前敕優免差役所逋租稅孳生等項悉與蠲免巡按御史按

察司官廉察各府州縣官吏里巷剝削貪酷及官員軍民家取索

舊債虐害復業之民治以重罪 江華等縣強賊廖馬孫等伏誅

丙午朔州衛指揮王瑛私役軍卒出烟墩十里爲虜寇所執又

掠瑛等馬騾出境 丁未太原汾溢決隄 戊申命行在兵部以

馬五百匹給宣府左右前後衛騎士之操神銃者 命行在工部

建少師吏部尙書蹇義宅於文明門之內 己酉貴州太平代長

官司頭目宋海等來朝貢馬 癸亥罷內官入番買馬 甲寅行  
在鴻臚左少卿張隆奏薊州永平山海等處關營歲用糧科二十  
二萬三千四百餘石欲令遵化等衛所薊州等州縣發民總兵官  
陳敬添撥軍士於林南倉關運貯於遵化永平山海倉以備支用  
從之命俟秋成後起民夫及於各營堡撥軍守關者毋輕動 乙  
卯以罕東衛班麻思結爲指揮使因自陳征曲先有功 御製官  
箴成 都督府吏戶禮兵刑工部都察院太常寺大理寺通政司  
詹事府翰林院左右春坊司經局六科光祿寺鴻臚寺太僕寺國  
子監欽天監京府行人錦衣衛中都留守各都司內外諸衛布政  
司按察司府州縣王府官鹽運司儒學凡三十五篇

七月戊午命行在工部凡所役神機營五府各衛繕工旂軍人月加  
給米一斗鈔五錠 遣指揮丁全趙回來的等齎敕及金織綵幣  
表裏賜泰寧衛掌衛事都督僉事脫火赤等朶顏衛都指揮僉事

哈赤哈孫等福餘衛都指揮僉事安出等以能綏撫其衆恭事朝廷 己未實授山西都司署都指揮僉事李貴爲都指揮僉事時虜犯境貴率官軍擊之生擒寇四人奪馬二十七匹 改交趾上洪州等衙門歸順土官知州等阮遷干等四十五員爲山東山西青州等府州縣通判判官照磨驛丞 行在戶部奏直隸松江府沒官田宜準民田例起科積年逋負稅糧請蠲免以甦民困從之 命今後各處官田皆準此例 辛酉遣戶部侍郎成均往浙江巡撫召趙倫還有言倫督糧賦用峻法 庚午哈密忠順王卜答失里遣指揮拾黑馬黑麻等及哈烈等處頭目沙哈魯米兒咱遣使臣馬速等來朝貢駝馬玉石 壬申肅王瞻焰奏甘州中右二護衛官軍皆閒逸無差遣欲止留一衛請以一衛歸朝廷助備邊上遣都督僉事王彧副都御史賈諒齎書以復聽簡留一衛所歸朝廷者令挈家屬赴甘州補前後二衛守備之數 曲先衛都指揮

同知那那罕遣百戶阿答剌肥河衛女真指揮同知卜刺罕等來朝貢駝馬 置呂梁漕渠石閘 辛巳免慶王寧夏中護衛備邊兵及永和王濟煇慶成王美靖大同戍兵之半 癸未上登萬歲山坐廣寒殿召翰林儒臣侍上曰此元之故都使順帝能恭儉長守世祖仁宗之法天下豈爲我祖宗所有又曰茲山茲宇順帝所日宴游者也侍臣叩首曰紂之跡周之監也上曰然

八月辛卯賜哈密使臣拾黑馬黑麻及哈烈等使臣馬速等一百七十九人剌肥河等衛指揮同知卜刺罕等曲先衛百戶阿答等白金紗羅絹布及金織絹布金織紵絲襲衣有差 壬辰升曲先衛指揮同知那那罕爲指揮使副千戶瓦思答兒爲指揮僉事經歷瓦撒爲正千戶百戶阿答及頭目卜兒只等三人爲副千戶 癸巳車里故宣慰使刀更孟子霸羨遣頭目召哀等貢象馬 巫凱奏瀋陽中鐵嶺二衛指揮宋禮千戶朱斌等在職皆與同僚爭私

意終不悛革致廢弛公務請悉調新置諸衛所自今遼東諸司所屬軍官有同僚不和妨廢公務者請一體調衛從之 甲午給鎮守遼東軍士馬五千匹守備開平等處軍士馬六百匹 丁酉朝鮮遣尹季童等來朝貢 己亥移東安門於橋之東 庚子命各處巡撫侍郎同巡按監察御史考察方面官仍同布政使按察司考察郡縣官 召鎮守密雲蔣貴還京以神機營同知李榮代壬寅敕諭安定王亦攀丹及安定衛指揮僉事桑哥阿刺乞巴指揮使魯古答紀等曰去年調爾等討散即思今已有其罪俾復業那那罕等本無罪之人而其親屬爲爾等俘虜即遍索部下但有得其家口者悉給還之仍遣那那罕及指揮僉事白帖木兒等齎敕往西番江招撫米刺苦朮等俾歸曲先 修通州通流閘及南海子紅橋等閘 癸卯格失迷頭目宰奴阿卜丁遣打刺罕迭力迷失等來朝貢馬 升罕東衛頭目班麻思結爲本衛指揮使賜

敕曰往因曲先衛散即思縱所部劫烏思藏使臣及殺傷官軍故發兵勦捕爾聞官軍至即率衆從征擒殺賊徒獲其駝馬牛羊以獻遣人齎幣賞功今升爾爲罕東衛指揮使 土魯番城舍人陳檀等來朝 乙巳湖廣高羅安撫司木冊長官司護印舍人田賢遣舍人譚潮美東鄉五路安撫司搖把洞長官司長官向默古遣把事黑牛送等貢馬及方物 敕沿邊諸將曰今秋高馬肥正虜寇南行之時須晝夜嚴督官軍謹備不可怠忽 都指揮僉事馬驥鎮密雲提督關隘 庚戌命赤斤衛故指揮僉事朶兒只失加之子亦魯伯沙州衛故指揮僉事禿魯思子忽禿不花故指揮僉事鎖南子曲列該曲先衛故指揮散即思之子都立等俱襲職 懷安等衛奏請軍器乞增神機銃一百火砲一百於諸隘口隄備與之 辛亥置蘇州濟農倉凡糧當運南京倉以備北京軍官月俸者率每石加費六斗周忱奏請軍官月俸就蘇州給之而徵其

加費米四十萬石悉儲於官通前所糶六十九萬石有奇凡糧遠  
運有失及負欠者悉于此給借賠納秋成抵數還官若修圩岸浚  
河道有乏食者皆於此給之 壬子遣羽林前衛指揮僉事昌英  
往哈密賜忠義王脫歡帖木兒等肅州衛指揮同知韋文等往赤  
斤蒙古曲先罕東等衛賜指揮僉事倉兒吉等 癸丑劉廣奏甘  
州諸衛皆步兵艱於巡邏今欲每衛選二百人充騎士教練從之  
陝西都指揮僉事劉永掌陝西行都司事 乙卯迤北韃靼脫  
脫緊納咬兒等來歸 革河南林縣東得峪上下關及西得峪關  
展撫寧衛城

九月丁巳李謙言偏頭關外地臨黃河皆邊境衝要之處草木茂盛  
如大同宣府例至冬初發兵燒荒 貴州都勻衛陳蒙爛土長官  
司副長官張勉奏本司離衛遙遠地連古州八萬生苗廣西苗獠  
洞寨與所屬化從寨苗長韋翁同等相誘爲惡叛服不常乞如永

樂故事調廣西泗城州土兵一千立堡鎮守遇有緩急即行勦捕  
命兵部從其言 戊午西寧衛官軍仍留馬隊三百六十六人在  
甘州守備 己未割肥河衛指揮僉事牙失答來朝貢馬 賜雲  
南車里故宣慰使舍人刀霸羨所遣頭目召哀等仍命霸羨襲其  
父職 巫凱等奏亦馬忽山衛指揮木答兀等來報福餘三衛韃  
軍往掠阿魯台爲阿魯台所敗盡收其家口輜重三衛之人奔往  
海西或在遼東邊境外招之不來已整飭軍馬備之 鎮守肅州  
都督王貴奏肅州西北極邊昨遣人往各處戒飭官軍守備惟一  
人還哨探至寒水石口見同差之人皆被殺疑赤斤衛都指揮旦  
旺失加部屬所爲 庚申賜格失迷頭目所遣打刺罕迭力迷失  
等綵幣表裏仍命齎敕及綵幣等物歸賜宰奴阿卜丁 壬戌參  
政沈國上言四事一乞敕鄭亨內官郭敬以各處神銃取回各城  
團聚操練二山西行都司所轄十二衛俱臨極邊乞勅兵部今後

本司屬衛襲替視果精健則俾還原任否則調入內地擇內地之  
堪任者補之三乞敕戶部凡各衛官軍有力耕種者計其田畝歲  
納糧數準作應支俸給有多餘者仍舊納官不及本等俸者如數  
補給其旂軍餘丁所種地土應納之糧給與自食或三分中減納  
二分庶使軍士得遂所養四乞令天下衛所勘取軍士鰥寡孤獨  
篤廢殘疾無親戚可依者養濟如貧民命六部議行 癸亥命天

下郡邑督民栽種桑棗

戊辰應天府尹張璘卒

字文玉黃岡人

辛未都指揮錢義仍守薊州李英署都指揮僉事守遵化 劉

廣奏虜入蘭州又入永昌衛劫掠水泉兒水麋川二驛人畜 丁

亥南京兵部右侍郎甄儀致仕

麟游人

庚辰容美宣撫司遣通

事黃家得廣東新興縣獠獠有清等來朝貢 上出所賦織婦

詞以示左右 辛巳命鄭亨以先撥山西都司官軍五百人還李

謙 壬午胡濙奏天下庫藏所貯金銀寶玉珠翠紵絲綾羅布帛

銅鐵顏料等項與凡違禁物皆送京師其不堪起運衣服等類折充所在文武官俸給軍器付附近衛所從之 甲申哈密忠順王卜答失里遣百戶他竹等二人奏事至京 行在戶部奏陳瑄言總督官軍一十二萬歲運淮安臨清倉糧五百萬石赴北京軍士疾病逃亡糧多不足公議於南京豹韜左等衛及各都司直隸衛所軍餘內增撥通一十六萬人從之 巫凱奏前有敕令海西指揮塔失納答等追取造船逃軍五百餘人凡野人女真所匿者皆已追出餘山寨頭目刺令哈等多隱匿不還請領兵追索上曰且諭以禍福如不悔發兵未晚

十月丙戌增通州通濟倉通州衛定邊倉神武中衛通州左衛右衛倉副使各一 己丑行在戶部奏昨寧遠等衛備禦都指揮劉斌言寧遠廣寧兩衛軍儲皆仰給永平諸府衛今旱潦田禾少收恐供給不足乞將法司罪囚定例運米以備支用宜準所言 辛卯

後軍都督府都督僉事張廣卒

天長人

壬辰沙州衛韃韃卜顏

帖木兒等來朝貢馬

己亥西寧衛國師鎖南兒監參等遣禪師

裸古臧卜等來朝貢馬

行在左副都陳勉親喪服闋命復原職

庚子上以亦力歪思把思王母能敬朝廷而歪思與其子撒禿

不睦興兵相殘遣指揮雅忽等齎敕諭意宜約束所部保境息民

行在禮部左侍郎致仕李嘉卒

字允亨宛平人

乙巳行在右

軍都督府奏西番烟藏等族千戶秦月作等所屬番人聚衆劫掠

囊哥藏卜等族殺其族首勅陝西三司及巡按委官率軍往擒犯

者解京師 戊申鞏昌衛土官都指揮僉事汪壽等貢馬八百大

甸土官宣慰使刀招散遣人貢方物且奏云波勒常以土酋土雅

之兵來寇乞發兵討之敕諭使敦睦 癸丑宥陳懋罪

十一月戊午朝鮮遣李尙興等貢方物 朱勇言五軍神機等營官

軍操備者請援例放回俾依期而至其間有老疾不堪令有司選

精銳代之 辛酉命行在戶部遣人驛召陳瑄及各處催糧侍郎趙新等俱以歲終至京上欲漕運難易糧賦征收一切軍民利病各令面陳其事故召之 戶部員外郎羅通奏按宣府至獨石僅三百里四日可到至赤城雲州雕鶚三日至龍門二日若以山西布政司稅糧比上年多撥十萬石令譚廣分撥所統軍士及萬全都司軍運送七日可以往回庶不勞轉輸而邊軍足食命行在戶部即議行 丁卯升江西按察副使劉洵爲四川按察使 改西寧衛爲軍民指揮使司從劉昭奏 辛未朝鮮遣趙璵等來朝貢 巡按雲南御史杜琮言雲南黑鹽等井額辦鹽課每塊重二兩販易甚利於民後因竈役以官鹵煎燒灰土夾底小樣者納官餘皆掩爲己利客商無利不肯中納 丙子泰寧等衛都督僉事脫火赤遣指揮僉事猛可帖木兒朶顏衛指揮僉事逞吉兒等來朝貢焉 迤北韃靼倘徹兒率妻子來歸 辛巳邊報阿魯台部衆

東行攻兀良哈敕沿邊諸將嚴備 甲申起魏源河南左布政使

增淮安揚州濟南青州東昌兗州萊州登州八府佐貳官各一  
專理賦稅巡撫侍郎曹弘奏山東六府糧草多屬京都舊無糧長  
只是委官催督官少事多缺人差委往往稅糧虧欠及淮安揚州  
二府亦係衝要乞俱增設同知或通判一專職理辦

十二月丁亥劉昭言所徵河州衛各番族茶馬七千七百餘匹已徵  
六千五百餘匹給與陝西官軍操練其未到者乃必里衛諸族今  
年多疫西寧等衛所屬番族茶馬三千二百九十六匹已徵二千  
三百餘匹給軍安定罕東二衛路遠未納請候來年徵之 庚寅  
琉球遣使者阿普尼昱西寧衛灌頂眞修妙應國師劄恩巴監參  
格監參葛林等衛女眞指揮同知安禿等來朝貢馬 辛卯慶王  
楠奏欲於明年二月往韋州上復書曰韋州之行悉從所便今虜  
酋旣斃部曲離散稍稍近邊出入須用防慎 壬辰秦州衛奏地

臨極邊數被番賊爲害敕劉廣即於秦州調來官軍內發五百人  
還之 山西官軍戍大同者遣還守偏頭關 洮州衛刺麻監東  
鑽竹鎖南藏卜等朝貢馬 丙申陝西必里衛故國師裏羅星吉  
姪完卜札恩巴舍刺湖廣施州衛施南宣撫司舍人覃海廣西利  
川等州縣土官何朱等來朝貢馬 戊戌貴州按察使應履平奏  
貴州都司各衛官軍原調廣西備禦者萬餘人後分兩班每歲更  
代如宣德五年二月遣還五千餘人其中逃者二千八百有奇貴  
州衛所軍伍日空且貴州諸衛城池二十有六屯堡七百有餘山  
洞險阻蠻人叛服無常明知守卒疏懈輒乘虛劫掠今篁子坪蠻  
人作耗尙未克復乞敕兵部凡貴州調往廣西官軍悉令還衛命  
行在兵部移文都督山雲嚴責廣西都司屬衛速取逃故軍士爲  
用其貴州調來更番操備者暫且留之俟編發去軍士足以調用  
即盡遣還 造懷慶府城北沁河丹河橋 庚子會昌縣賊徐士

榮等糾集廣東福建逋逃軍民劫掠勅江西廣東二都司發兵捕之 壬寅貴州貴竹長官司把事羅源木東長官司舍人胡海湖廣石梁下峒長官司唐思林等來朝貢 置遼東寧遠衛貴州烏撒衛陝西寧夏羣牧所中都留守司洪塘湖屯田千戶所倉副使各一山西太原府保德州倉大使副使各一 行在兵部右侍郎王驥言四川烏蒙烏撒二府互侵土地不服三司辨理宜選能幹官二人往會巡按御史三司各委官同詣其地令各還侵地 廣東都司奏南雄有寇百餘出沒調廣州前衛指揮率軍往捕 癸卯朝鮮遣李興發等貢賀明年正旦 朶顏衛都指揮僉事完者帖木兒屢遣人朝貢賜敕嘉獎 迤北韃靼安哥帖木兒等來歸命爲所鎮撫 甲辰升陳智爲江西右布政使 陝西右參政吳福爲福建右布政使 乙巳四川龍州土官知州薛忠義泥溪溪等長官司長官王鳳遣把事王永壽等白馬路長官司副長官薛忠

遣舍人薛志宣大魚等關百夫長薛忠恕遣舍人薛志厚貴州十  
二營長官司副長官蕭珣養龍司長官蔡昇湖廣散毛宣撫司舍  
人覃圮等來朝貢 丁未湖廣唐崖峒長官司長官黃敏廣西東  
蘭州故土官舍人韋翫遣族人韋仲平南丹州土官知州莫禎遣  
頭目莫父隆四川蠻夷長官司長官文昌保沐川長官司長官悅  
福得遣土吏侯清文川縣寨水巡檢司土官巡檢高茂林太平代  
長官舍人宋斌雲南鶴慶軍府土官知事董壽等來朝貢馬 免  
甘州前後二衛所調補守備官軍一年徭役 戊申命行在戶部  
歲給米二百石優贍故安順侯薛脫火赤妻憫無子孫襲爵 禁  
約甘州操備與下番官軍擅乘各站馬驢往來市易 己酉增置  
陝西岷州衛西國千戶所吏目一 庚戌廣西安隆長官司四川  
疊溪等長官司鬱即長官司天全六番招討司芒部軍民府湖廣  
九溪衛桑桂安撫司貴州青州長官司康佐長官司慕義長官司

來朝貢 命署湖廣都指揮僉事吳亮爲都指揮僉事副陳瑄運糧 辛亥陝西行都司土官都指揮僉事魯失加海西益實衛指揮木魯當加四川馬湖府故土官知府弟安琦平夷女土官王氏湖廣鎮南長官司副長官董全貴州乖西長官司長官楊暹西番賈藏番人倉阿兒來朝貢

宣德八年正月戊午江西都布按司奏信豐會昌雩都等縣賊徐士禮謝士文等據長河洞數出爲寇敕發兵捕之 癸亥湖廣永順宣慰使彭仲四川烏撒軍民府土官知府尼棍石柱宣撫司宣撫馬真陝西階州千戶所番僧鎖南朵兒只等來朝貢馬 行在工部奏陳瑄言運糧軍士增多再宜造船三千艘請於湖廣江西浙江支官鈔市木造二千艘四川產木州縣造五百艘舊海船損敝者改造五百艘從之 乙丑陝西靈州千戶所千戶土官乃蠻四川烏蒙軍民府署府事女土官楊普遣把事納舉等來朝貢馬

庚午朝鮮遣姜籌等貢賀萬壽 四川永寧宣撫司等衙門女土  
官奢蘇遣把事黃恕陝西文縣東峯四頭平等族番僧多只札等  
來朝貢 癸酉湖廣左布政李琦致仕 甲戌勅趙新等曰茲命  
爾等巡撫郡縣一切稅糧皆從爾設法區畫衛所屯種從爾比較  
水田圩岸亦從提督應有便民之事悉具奏聞 貴州臥龍番長  
官司長官龍智保金筑安撫司安撫的珠遣頭目徐敬通等廣西  
龍英州土官趙敬遣族人趙福等來朝貢 設隆慶州醫學置典  
科一 丁丑迤北韃靼刺苦來歸 土魯番城回回僧海失都來  
歸願居甘州 戊寅迤北韃靼白龍帖木兒等來歸命爲千戶等  
官 廣東瀧水封川二縣山獠黃緣忠等從化來朝賚之遣還  
羅汝敬言甘肅素宿重兵糧餉爲急請令行在刑部都察院移文  
陝西三司及行都司并臨鞏等衛罪囚一循寧夏納米例莊浪以  
北者於肅州衛上倉臨鞏等衛於甘州左衛上倉又甘州左等一

十三衛屯田地高土冷子粒少收宜寬減之令五十畝上納餘糧  
五石悉從之 庚辰敕南京守備襄城伯李隆同周忱總督南京  
各衛所屯田 四川都布按司奏廣安定遠等州縣強賊白晝殺  
人燒燬公廨敕三司堂上官親督討捕 辛巳劉廣奏請取甘州  
左等十一衛屯軍三千六百人還衛更番守備從之 廣又奏有  
自虜中來者言咎卜等欲掠鎮番涼州請先勦之敕宜謹備

二月乙酉朝鮮遣金乙賢等貢方物 庚寅和寧王阿魯台遣使自  
遼東入貢敕巫凱等曰往年虜使皆自宣府大同入境今迂路自  
遼東入或欲窺覘作過應謹備之 廣西田州府土官岑紹遣頭  
目黃柱貴州平伐長官司署司事舍人庭若等貢銀器及方物  
辛卯朝鮮遣朴信生朶顏等衛指揮不答兒花幹遣千戶把刺陝  
西階州惡昞等族番僧刺麻烏巴刺宗失等貢馬及方物 命法  
司凡軍職犯賊者死罪降等用徒流罪發輸作畢日俱調邊衛備

禦非賊罪者不調 巫凱奏署都指揮僉事楚勇等專督守備不  
嚴約束致虜入義州殺守墩軍士命勇及巡守指揮千百戶俱罷  
俸捕寇 播州宣慰使楊昇遣副使楊晶東川軍民府土官攝管  
遣叔阿圭廣西思明府知府黃瑠遣族人黃趙良泰寧等衛韃官  
都督僉事脫火赤遣指揮僉事可赤哈等來朝貢馬 庚戌升建  
州左衛土官都督僉事猛哥帖木兒爲右都督都指揮僉事凡察  
爲都指揮使 以烏撒烏蒙二府土官祿昭尼祿仇殺遣行人章  
聰侯璉齋勅往諭 廣東賊入石城縣廣西賊入陸川縣皆殺人  
劫財敕勦捕 己亥劉昭子震特授指揮僉事 增長沙武昌黃  
州衡州岳州荊州等府佐貳官各一專督稅糧 行在兵部奏扯  
兒禪指揮伯蘭火者告宣德四年來歸時經沙州衛西番把都仲  
加三兒劉骨奄卜朶忽思等劫其人口四百馬駝千餘羊五萬乞  
追還敕劉廣審究 庚子琉球中山王遣使者魏古渥制阿蒲察

都等進表貢馬 壬辰革山東都司濟南衛倉萊州衛倉青州左  
衛倉副使以不收糧 設沛縣新興閘謝溝閘湖陵城閘魚臺縣  
南陽閘八里灣閘堂邑縣梁家鄉閘置閘官各一 登州衛指揮  
僉事戚珪言山東沿海設十衛五千戶所以備倭寇其馬步軍專  
治城池器械水軍專治海運後調赴京操備營造軍士已少都指  
揮衛青復聚各衛馬步水軍於登州一處操備遇夏分調以守文  
登即墨等處及秋復聚倭船肆虐無分冬夏倉卒登岸急難策應  
請以原設捕倭馬步水軍如舊守備命山東三司及巡按御史計  
議以聞 雲南蘭州土官知州羅牙等大營諸寨首者保等搶掠  
村寨殺虜人民 乙巳行在戶部右侍郎趙倫降山西布政司左  
參政 四川八郎安撫司土官阿性遣姪林正先結貴州平浪長  
官司副長官王阿童遣子彌等來朝 哈密忠順王遣鎮撫虎賽  
因等二人女真指揮僉事猛古等六人俱奏事至京 丁未禁京

城商稅之弊有言在京權豪貴戚及無籍之徒停積商貨隱匿官稅 戊申敕猛哥帖木兒凡察等令以初隨楊木答兀漫散官軍悉送京師 和寧王阿魯台遣使臣孛羅台等來朝 己酉阿魯台部屬哈把兒禿等及泰寧衛韃靼哈刺把都來歸奏願居京命爲指揮同知等官 以招諭遠夷勞喜樂溫河衛指揮同知出兒不花卜洽爲指揮使正千戶亦昂哈亦稱哈爲指揮僉事副千戶吉宋哈爲正千戶阿真河衛指揮同知撒兒乞灘撒里亦答爲指揮使 速平江衛指揮僉事羊加瓜英哥爲指揮同知 辛亥兀者肥河等衛奏阿魯台部衆數經其地恐其侵擾欲以兵拒之敕約束部下謹守地方來擾則禦不擾亦勿侮之 壬子陞建州指揮僉事不顏禿爲指揮同知毛憐衛指揮使卜兒客爲都指揮僉事同知哈兒禿指揮使 癸丑以內迷副千戶哈只阿黑蠻導哈烈等處使臣來朝升指揮僉事

三月甲寅禮部策舉人劉哲等 戊午設四川烏蒙府儒學置教授

一訓導四 庚申朝鮮遣李尙恆廣西鎮安府土官知府岑永壽

遣族人岑福等貢馬 壬戌都司布政司按察司官按行所部給

驛 山東按察使虞信言山東都司衛所營屯官私役軍丁怠廢

農務如濟南衛軍旂總五千六百人隨營餘丁老幼亦不下千餘

人宣德五年下屯止百五十人六年四百七十人七年四百八十

人似此屯田糧何由積乞敕兵部遣官通行點視務究其實 甲

子雲南浪穹縣十二關巡檢司土官巡檢張護來朝貢 復置隆

慶州守禦官軍 徙置陝西黑松林岔口眞景水泉兒四驛革鎮

羌水磨川南大通四驛松林驛徙安遠岔口驛徙大燒城眞景驛

徙永昌城東水泉兒驛徙水磨川北三十里 乙丑升三萬衛指

揮同知裴俊爲都指揮僉事理鐵嶺衛事 丁卯貴州豐寧司土

官舍人楊震廣西鎮遠州土官舍人趙得興來朝貢 建州左右

衛頭目早哈來朝 肥河等衛女真指揮僉事咬失等奏事至京

戊辰哈烈貢使馬速陞辭遣中官李貴等送歸并齎敕往撫賜沙哈盧鎖魯檀及頭目綵幣 己巳遣指揮同知趙灰來的等往

撫秦寧朵顏福餘三衛官軍 庚午指揮朱謙率兵二千支獨石

倉糧二千石防護往開平 河州西寧番僧刺麻孔思把捨刺爲

國師遠丹巴舍羅臧卜勺吉札思巴鎮南監察俱爲禪師 癸酉

遣使齎敕招撫黑水西番及阿容等族地近松潘數引寇犯邊

甲戌以濟南東昌兗州飢免追虧欠孳牧馬并科買顏料起取民

夫 遣御史巡察京衛倉 茂州蓬族等寨首頭目李小保等來

朝貢 八郎麻兒匝安撫司及思囊兒金牌等十四族朝貢之使

陞辭敕還諭土官俾約束所轄毋復作過 虜掠寧遠昌寧人畜

陝西永昌

丁丑都指揮僉事穆肅掌西寧 戊寅嘉河衛指揮

乃刺禿等差指揮卜顏禿來奏阿魯台部屬徒忽刺温之地迫近

本境恐其爲患今以所部人民移居近邊乞賜優容敕旣近邊居亦宜安分勿縱部擾害邊人遂敕阿魯台戒約部屬勿擾隣境庚辰詔內外優恤軍士 馬亮仍理右軍李英仍理中軍 廣西思同州土官知州黃崇廣奏議州土官董宗蔭遣人朝貢 福餘衛等處韃靼鎖的革等來歸命爲所鎖撫 胡濙奏南北二京官折支俸鈔請每石減作一十五貫文武官旂軍同從之七分折與官絹每疋折鈔二百貫三分折與官綿布每疋折鈔二百貫 壬午減軍衛餘丁之在營者禁約軍丁在營不得過二人 哈密兀者左衛指揮僉事亦里不花嘉河衛指揮僉事卜顏禿等來朝貢駝馬方物 癸未遼東東寧衛韃官指揮同知牙令哈鹽井衛馬刺長官司副長官阿你遣舍人阿別省臧族土官百戶朵兒只秀遣舍人咎卜靈贊善王喃哥兒監臧遣番使且汪都元帥汝奴監臧都指揮阿爾結等遣頭目鎖南鎮占等來朝貢

四月丙戌雲南鄧川州把事何懋等來朝貢馬 府軍前衛指揮同知魏忠等十人奏願以子隨侍東宮許之 上作廣寒殿記 己

丑雲南德勝關驛故土官驛丞子王鍾廣西金茗州土官弟許武賢結倫州土官知州馮永高遣人來朝貢馬 廣東罪囚依京師

納米贖罪官吏軍民人等雜犯死罪以下於附近倉支糧運赴雷州府徐聞縣及海安千戶所收貯以給海南軍士 乙未增行在後軍都督府經歷司都事一 丙申敕鎮遠侯顧興祖監督收馬

初四川都司奏本處官軍除舊操備九千五百餘人又有運糧守堡者千三百餘人又松潘調往六千八百餘人通計近二萬人乞勅陳懷備禦官軍如寧夏例分爲兩番從之至是懷奏松潘衛南至保縣東至江由城池關堡三十餘處皆諸種生熟番蠻雜居官軍分守悉經奏準且今疊溪雙馬諸番蠻或肆攻劫或不肯出租賦服徭役已久遣人撫捕乞聽仍爲三番調征官軍仍存操備

人  
上謂行在兵部侍郎王驥曰松潘昔無多軍城池未常失守虜蠻亦未敢爲非比年有總兵官領軍兵鎮守番蠻乃時出沒豈非不能撫捕之故彼只利軍馬衆多不思供給之難即遣人諭懷必如寧夏例 雲南陸涼州土官沙共子資曹貴州十營長官司故長官隴得妻色鳩等來朝 戊戌以南北直隸河南山東山西旱下詔寬恤停徵宣德七年十二月以前欠糧免拖欠各色程課坐派買辦諸色物料及孳牧馬驢牛羊牲口 辛丑永康武義麗水等縣強賊陳初等劫掠人財殺傷永康縣丞朱俊敕三司發兵捕之 癸卯陝西右參政奏秦王之國有羊三千散養於民每歲徵羊羔千二百隻臣觀王府自有儀衛及儀衛司且多牧地宜收現存之羊使自牧養供用庶蘇民力從之 丙午詔天下州不及二十里者歲貢生員一人過二十里者貢如舊縣不及五里者五歲貢一人不及十里者三歲貢一人過十里者貢如舊

按此謂編戶之里

四

川鄆彭諸縣盜賊縱橫命行在副都御史賈諒等會四川三司調軍捕之 己酉汶川縣番僧娑南令正等來朝貢馬 故山西都司指揮僉事長吉子帖木兒襲爲金吾左衛指揮使

五月丙辰秦寧衛都督僉事脫火赤遣指揮僉事板不來木興河衛女真指揮僉事鎖升加威州妙智通悟國師之徒刺麻温卜加瓦藏浪穹縣土吏張惟善等貢馬 丁巳蕭授奏烏羅府治古等長官司殘苗吳不爾等作亂率貴州四川湖廣兵進至篁子坪攻破新郎等寨前後生擒賊首吳不跳等二百一十二人殺吳不爾王老虎龍安軸等餘黨悉平得所掠軍民九十八口悉給親屬所獲賊屬婦女幼弱一千六百一十二口以賞從征官軍械吳不跳等至京下錦衣衛獄 戊午安順府土官同知阿寵遣把事陳庸等來朝貢 庚申府谷神木二縣有逋逃軍民百餘家聚於邊境野人溝等處俱挾兵器依阻山林潛出境外恐誘虜寇犯邊上曰此

皆軍衛有司虐民之故遣官齎敕貸其罪俾回原伍若怙終不回必發兵勦捕 辛酉兀者右衛指揮僉事兀列哈等來朝 迤北來歸指揮同知哈巴兒禿等及家屬三十八人至京賜紵絲襲衣鈔絹布花有差幼稚亦各有賜 行在兵部右侍郎王驥言陝西去京路遠官軍分作三班更代則一班之人在京常有二班在衛守備庶幾兩便從之 壬戌秦寧衛掌衛事都督僉事脫火赤卒命其弟指揮同知拙赤爲都督僉事仍掌衛事撫輯民人 癸亥新寧伯譚忠卒 清流人 丁卯山雲討宜山縣蠻寇擒殺賊首蘇公夏等五十八人餘賊解散 辛未占城遣使臣逋沙怕麻叔等來朝 福餘衛鎮撫煖禿兒率屬來歸命爲千戶 王驥奏各都司衛所俱缺老成能幹之人逃亡愈多虛費供億宜行各巡按御史按察司及總兵官從公推選每都司衛所掌印官各一人及選老成能幹佐貳官二人常留一人在任理事專一整飭軍馬繕修

器械完固城池比較屯種稽考勘合勾軍之人從之 壬申召方  
政還京 雲南路南州把事楊惠子楨來朝貢馬 癸酉命陳濬  
爲後軍都督僉事充參將代方政提督開平獨石長安嶺永寧諸  
處巡邏備禦 修北京南門外橋 丙子賜日本使臣道淵等二  
百二十人紵絲紗羅絹布及金織襲絹衣銅錢有差 丁丑李賢  
掌行在前軍都督府事裁通積廣積二抽分竹木局大使各一副  
使各一 己卯行在兵部請召還監守居庸等官舍人從之 庚  
辰山東右參政沈固任滿考最升二品祿仍於鄭亨處治軍機文  
書 辛巳朝鮮奏叛虜楊木答兀屢寇掠其邊境敕嚴兵備至則  
殺之仍敕巫凱謹邊防

六月壬午陳濬奏千戶楊洪巡邏至洪山與虜遇行至禮拜寺洪擊  
敗之敕緣邊守將皆嚴兵備 癸未方政佩平蠻將軍印充總兵  
官蔣貴爲左軍都督僉事充副總兵鎮守四川松潘等處四川都

司行都司所屬衛所悉聽節制 酉陽宣撫司土官僉事冉應良  
遣頭目冉福宗等來朝貢 毛憐等衛僉事撒滿答失里等十五  
人來朝 巫凱奏朝鮮擅攻建州衛請詰問之先是朝鮮國王奏  
毛憐建州之人詐爲忽刺温野人裝束凡四百餘騎犯朝鮮邊境  
劫殺軍民建州毛憐二衛亦奏忽刺温野人頭目木答兀等掠朝  
鮮人口遇朝廷所差內官已追還之朝鮮謂實建州所爲故加以  
兵遣人齎敕諭朝鮮國王及忽刺温野人頭目木答兀等建州毛  
憐二衛宜解怨釋仇各還所掠並守封疆安其素分 甲申沙州  
都督因即來遣指揮苦竹帖木兒等來朝貢 乙酉上作閱旱之  
詩示羣臣 丁亥行在戶部奏減輕松潘中納鹽糧舊例 庚寅  
僉事王愷言天下衛所軍士月糧洪武間總旂月支米一石五斗  
小旂一石二斗軍一石永樂九年六月內奉勘合月支米七分鈔  
三分宣德八年五月內奉勘合各衛所軍有家屬者月支六斗無

者月支四斗五升廣西邊衛猺獞草寇不時竊發衛所正軍征哨  
戍守餘丁各有差使日用飲食衣鞋軍裝皆仰給月糧別無資產  
今更減支實爲貧難命如永樂九年例給之 辛卯四川雜道長  
官司長官安白姪甲失伯番僧刺麻偏那朵兒來朝貢 甲午韃  
官都指揮乃顏帖木兒等率其子者兒哈刺及故都督僉事把魯  
禿子把禿孛羅客薛弟把罕阿速台子脫只皆襲職 坤帖木兒  
姪阮可尙幼令優給餘故指揮使以下子姪襲職優給如例 乙  
未召河南左布政使魏源赴闕 起復貴州右布政使王敏赴京  
丙申復設廣安州守禦千戶所 以房口減少裁房山縣丞主  
簿各一 己亥建州衛遣指揮扎刺答等二人奏事賜綵幣 庚  
子左副都陳勉奏往贛州府信豐會昌等縣招撫徐士榮及逃民  
皆復業 辛丑廣西陀陵縣土官知縣黃璉遣頭目黃二遼東自  
在州女真頭目官音保來朝貢 甲辰泰寧等衛僉事把都兒臨

洮府刺麻那瞻補藏卜等來朝貢 乙巳敕江西都指揮僉事吳  
堅頭兵一千人鎮守贛州衛及信豐南安會昌千戶所往來巡邏  
戒飭軍士不許擾害良善四川都司奏捕獲廣安等州定遠等縣  
強賊王洪 丙午四川都司掌司事都督徐甫等奏烏蒙撒二  
府土官祿昭等爭地仇殺蒙遣行人奉敕與巡按御史李實及三  
司官往諭之皆悅服蓋所爭者本烏蒙之地爲烏撒所據今烏蒙  
耆老令以所爭地十之三讓烏撒治溝爲界求息爭訟 己酉四  
川平夷長官司女長官遣把事王貴貢馬 陳濬奏虜至開平沙  
窩殺百戶王賢軍士被傷者十人 行在刑部右侍郎葉春卒

鹽人

七月癸丑貴州右布政王敏調陝西右布政使 甲寅增戶科給事  
中戶部廣西清吏司主事各一專理南京後湖所貯黃冊 丙辰  
宜賓縣民言四川筠連茶課司自洪武至永樂間所徵茶課積至

三百餘斤別無支用乞準戶部口食鹽給與附近軍衛有司從之  
戊午賜朝鮮及撒馬兒罕貢使宴 己未命行在都察院嚴私  
通外夷之禁 宥江西永新縣賊首蕭彥真等復業 庚申史昭  
奏舊於寧夏黑山嘴立哨馬營屯駐騎士近爲黃河墊沒欲於附  
近便宜之處別築營守備從之 辛酉南康等縣強賊劉仁遠等  
伏誅 設武驤左右騰驤左右四衛以御馬監養馬軍十實之  
甲子廣寧等衛指揮盛寬等領兵巡邏見虜騎三二十人或五七  
十人或三五百人云是福餘朶顏泰寧三衛指揮千戶家屬往虹  
螺山圍獵巫凱以聞 益實等衛女真指揮使木當加等三十五  
人奉命往福餘等衛招撫還賜綵幣表裏等物有差 丁卯福餘  
衛都指揮僉事安出奏歲飢民貧無食欲於邊城貿易以給乞免  
一年買馬課程上曰爲君卹人何間遠邇命所司從之 戊辰改  
陝西左布政周璟爲雲南右布政使 廣東神電衛指揮張演總

神電雷廉三衛官軍捕賊賊百餘人從廣西陸川縣行劫至廉州石康縣等處演遣百戶張興等領軍緝捕被賊殺死軍旂七人又遣千戶李原等領兵追捕被賊殺傷官軍 壬申奴兒干都司故都指揮同知佟答刺哈妻王氏廣東感恩縣故土官舍人王紹等來朝貢 鄭亨奏虜入鴉兒崔殺千戶朱銘等五人參將都指揮曹儉率兵追之寇始遁走 癸酉敕行戶部侍郎王佐監督京倉置武驤左右衛騰驤左右衛經歷司經歷一 乙亥朵顏衛都督僉事脫兒卜察率其子朵羅干遣人進馬且請襲職遂命朵羅干爲都指揮同知升都指揮僉事哈喇哈孫亦爲都指揮同知命肥河衛故指揮使哈哈纏子刺令哈嘔罕河衛故指揮使必纏子乃胯各襲父職 丁丑賜泰寧衛都督僉事拙赤等福餘衛指揮僉事把孫等 迤北韃靼鎖住驢等歸奏願居京自効命爲副千戶 戊寅嚴官吏軍民隱藏逃軍逃囚之禁 己卯魏源署行在刑

部右侍郎

八月壬子沐晟奏雲南摩沙勒寨萬夫長刀甕及弟刀眷糾合夷兵  
侵占馬龍他郎甸長官司等衙門殺虜人民燒毀廬舍請遣都督  
同知沐昂於今冬率兵討之敕晟及雲南三司巡按御史遣人撫  
諭 甲申置行在旂手衛府軍衛龍虎衛陝西都司岷州衛西固  
城軍民千戶所陝西行都司鎮夷守禦千戶所倉副使各一 乙  
酉哈密忠順王答失里遣都指揮僉事亦麻刺指揮僉事速來蠻  
打刺罕舍人沙馬力等貢駝馬玉石 丁亥亦力把思歪思王母  
鎖魯擅哈敦遣使臣副千戶所的加兒哈刺馬反廣東德慶州猺  
人陳宗錫等來朝貢 戊子敕緣邊守將各嚴兵備 辛卯權安  
南國事黎利遣使人陳舜愈等奉表箋貢金銀器皿及方物 壬  
辰召南京兵部右侍郎徐琦赴行在命黃福兼掌兵部 亦麻河  
等衛野人指揮僉事抄刺你奴兒干弗朶河等衛野人指揮同知

必里加等來朝貢 陳懷下獄 癸巳裁行在戶兵工三部大理

光祿鴻臚北京行太僕寺及順天府郎中李本等官七十七員

甲午奴兒干都司都指揮同知康福哈烈頭目沙哈盧鎖魯擅等遣使阿力沙體兒迷使臣晃咱答兒阿力阿可捌兒及哈失哈使臣火者打竹丁等貢馬弗提衛女真指揮同知佛家奴等十七人從中官亦失哈往奴兒干還貢方物 行在戶部右侍郎王佐言請以濟陽等三十衛草場併爲三場每場設大使副使各一大興左等衛草場併爲一場設大使一從之命俱隸行在後軍都督府 戊戌砌潯州衛城西連大藤峽北接武宣千戶所 己亥行在兵部右侍郎王驥言欲移文蕭授山雲嚴督貴州廣西二都司屬衛勾軍官旂丁凡所勾軍士務欲完足有埋沒作弊者具實以聞 又言永樂中有例北京之人在廣西等都司衛所充軍有故勾丁者俱調河間衛今補伍已足又立涿鹿中衛請自今廣西中衛所

有勾丁者仍補原伍從之 庚子兀者右等衛指揮同知忽失禿  
等來朝 癸卯廣西思明府言祿州西平州永平寨巡檢司及古  
樓洞地方今歲黎賊侵擾民不安業前認秋糧四十五石乞爲除  
豁命從之 丁未勅漳州衛指揮同知石宣等嚴通番之禁 嘉  
河等衛女真指揮同知阿里不花等朝貢 廣西泗城州致仕女  
土官知州盧氏奏襲職土官岑豹率土兵千五百人謀害已豹叔  
利州土官知州顏亦奏豹興兵謀殺盧氏侵越地方州民受害命  
前使烏撒烏蒙行人章聰侯璉齋敕與山雲并三司巡按御史究  
豹與盧氏是非從公判決以聞 趙新奏會昌縣民米南鵬聚衆  
殺鄉民趙思賢劫財入山深爲民害勅捕兇渠脅從者俱釋之  
于謙言河南州縣連年旱傷稅糧免徵各驛供饋糧草多缺乞以  
河南郡縣併附近湖廣襄陽府罪囚除所犯應解京者如例其餘  
發邊衛納米贖罪者改送河南轉發各府衝要驛分納米與草贖

罪死罪五十石徒罪二十五石杖罪十石笞五石草每一束折米一斗五升從之 己酉靈藏贊善王遣番人劄失監藏來朝及迤北韃靼阿知八來歸命爲千戶副鎮撫等官 庚戌行在兵部右侍郎柴車奏遼東各衛屯田軍士貧富壯弱不均請分作三等有丁力牛具者爲一等有牛無丁爲二等貧難力單者爲三等以三等附一等之家借牛具種子秋收付還若此則三四年間人有贏餘可以免逃竄之患命行在戶部如所言之仍遣鴻臚少卿張隆常加提督

閏八月辛亥蘇門答刺國王宰奴里阿必丁遣弟哈利之漢等右里國王比里麻遣使葛不滿都魯牙等柯桂國王可亦里遣使不比里麻等錫蘭山國王不刺葛麻巴忽刺批遣使門你得賴等佐法兒國王阿里遣使哈只忽先等阿丹國王抹刀克那思兒遣使普巴等甘巴里國王遣番人馬刺足等加異勒國王遣使阿都儒哈

蠻等天方國王遣頭目沙獻等來朝貢麟象諸物御奉天門受之  
浙江左布政使黃澤考績來京 壬子行在戶部奏邊衛糧儲  
不足請召商中納鹽糧不拘米麥豆萬全左衛倉淮浙蘆鹽每引  
四斗懷來衛倉淮浙蘆鹽四斗五升永平府及古北口倉淮浙蘆  
鹽並每引三斗從之 廣西都指揮同知陳全有罪罷以大藤山  
獠賊掠去軍士二人不督兵追捕以鹽贖歸 癸丑日本國王源  
道義教遣僧有瑞等來朝貢 天津左等三衛路當衝要軍士不  
足於用請以所牧馬轉給河間所屬州縣民牧養從之 陝西都  
布按三司奏階州西固城番族及秦月作族皆輸情繼今不敢相  
侵奪 乙卯哈密忠順王卜答失里差都指揮同知兀馬刺亦撒  
格等來朝貢命兀馬刺爲都督僉事亦撒格來俱爲指揮僉事  
丙辰賜日本蘇門答刺貢使 置後軍都督府濟陽等十衛居賢  
坊草場大興左等四衛鳴珂坊草場大使副使各一 劉廣奏西

寧衛巴汝族番賊著兒加哥等二十餘人於涼州柔遠驛路劫奪過使衣物傷及人馬調都指揮包勝等領軍追捕已斬番賊管著失加生擒著兒餘皆奔遁乞敕西寧衛委官以名目授族頭俾捕獲送官明正其罪從之 丁巳長沙府知府李郁署行在兵部右侍郎 戊午右都御史顧佐有疾行在吏部尙書郭璉兼行在都察院事 辛酉賜哈烈使臣阿力沙等三百二十九人體兒迷使臣晃咱答兒阿力阿可捌兒及哈失哈使臣火打竹丁等銀及綵幣紗羅綾紬絹布有差 癸亥命哈密衛故都指揮僉事脫脫帖木兒子把禿帖木兒指揮同知禿刺子阿卜都刺襲職以哈密忠義王脫歡帖木兒所請也 甲子四川馬湖府土吏李昭及泥溪長官司土民劉勉等來朝貢馬及方物 置遞送口北軍囚宿舍十一所 乙丑升沙州衛指揮僉事桑加失里苦出帖木兒俱爲都指揮僉事 命沙州衛都督僉事因即來次子薛令爲指揮僉

事故指揮使薛迭古子撒力襲職都指揮僉事察罕不花自陳年老命其子阿赤不花代 己巳召南京右都御史熊槩赴行在鄭亨請於大同鴉兒崖貓兒莊之中米嶺等處添設二堡以軍防守 庚午命兵部侍郎徐琦行人郭濟齎敕諭黎利與舜俞偕行蓋申諭利令上順天道下造民福以令終 行在兵部奏太僕寺去年孳生馬騾駒計六萬一千五百九十匹請遣官印記命駙馬都尉趙輝永康侯徐安往監之 辛未貴州古州蠻夷長官司強賊楊云銀等伏誅 乙亥瓦剌順寧王脫歡遣使臣陝西丁等來朝廷臣言朝廷前三遣使入瓦剌皆未返宜拘留陝西丁等上曰姑善待之遣歸已而脫歡又遣鎖魯檀答刺罕等六人來奏虜中事皆宴賚而遣之敕脫歡曰前三遣使詣王所皆未返意者道路有阻俟道路通前使來歸即遣報 奴兒干喜申衛吉列迷車卜來朝奏願居遼東東寧衛命爲百戶賜金織襲衣鈔布仍命遼東

都司給房屋器物如例 丙子雲南木邦宣慰使罕門法遣頭目陶孟高答垠陝西洮州衛奄藏等族刺麻高僧亦什藏卜等來朝貢金銀器皿象馬方物 己卯以奴兒干都司都指揮同知王肇舟老疾命其子貴襲都指揮僉事食副千戶俸肇舟初自副千戶升都指揮貴屢使奴兒干之地諳其土俗至是衆請以貴代肇舟從之 命故都指揮僉事鎖鎖子鴉朴兒襲爲都指揮僉事於行在錦衣衛帶俸

九月辛巳遣內官雲僊等齎敕往木邦等處賜土官宣慰使罕門法等 劉廣奏瓦剌脫歡之使來言今道路已通朝廷可以遣使往來因具言前所以不通之故諭王驥曰此言未足信但令邊將嚴守備 壬午遣中官昌盛齎敕賜朝鮮國王李禔 癸未雲南孟緬掌官司土官長官姜嵩楚雄府把事李熙來朝貢馬及方物 給開平諸衛夜不收并各處關口臺墩哨探守瞭軍士七千九百

餘人皮襖狐帽 丙戌暹羅國王悉里麻哈賴遣使臣坤恩利弗等奉表貢方物 己丑置雲南騰衝州庫扛關庫刀關庫勒關右渾二關并南甸州賴邦哈九浪莽孟洞八巡檢司先是騰衝州奏本州路通麓川緬甸諸處人民逃徙者多有誤差舊四百夫長隸騰衝千戶所時其庫扛關五處皆軍民兼守今四百夫長已隸本州止州民守之乞於五處置巡檢司以土軍尹黑張保李甫郭節爲巡檢又南甸州奏其州與麓川宣慰使按境舊十二百夫長在騰衝千戶所時刺邦哈等處亦令軍民兼守後麓川侵據本州境土不守者十餘年今蒙朝廷敕諭還所侵地竊恐再見侵據又慮百姓逃移乞於本州賴邦哈九浪莽孟洞三處亦各置巡檢司以土軍楊義趙得趙榮三人爲巡檢命下三司覆勘至是咸奏爲宜遂置八巡檢司尹黑等悉授巡檢 壬辰哈密忠順王卜答米里等差指揮僉事捨黑馬黑麻等五人來朝 癸巳以鳳陽新城內

設官空房爲馬驛公館 甲午遣使勞鎮守松潘副總兵都督僉  
事蔣貴遣哥吉河衛差來指揮吉速你等齎敕命其衛故指揮同  
知可成孫末希納襲職 己亥敕沿邊諸將嚴守備先是有降虜  
言和寧王阿魯台部屬咎卜欲犯邊已敕諸將備之至是果入寇  
涼州永昌皆警劉廣遣指揮使李榮率兵追及之與戰殺咎卜父  
子及其黨八十餘人生禽三十餘人餘衆皆遁盡收其駝馬而歸  
敕劉廣及寧夏大同等處總兵嚴謹兵備 阿魯台使臣柳失等  
來歸福餘衛都指揮僉事完者秃等十一人來歸奏願居京自効  
命柳失爲百戶完者秃等爲試所鎮撫 庚子置雲南臨安府河  
底懷遠州播孟二巡檢司先是臨安府虧容甸長官司奏河底自  
洪武中官置渡船以濟往來路通車里八百諸長官司近來軍民  
有逃逸出境詐稱使者逼令乘載往往被害又緣河時有劫盜出  
沒夷民不安乞置巡檢司以故把事袁凱之子瑀爲巡檢威遠州

奏其地與車里諸宣慰司接境屢被各土官縱賊劫掠播孟實當衝要乞置巡檢司以把事劉禧爲巡檢命雲南三司覆勘至是奏以爲宜遂命建巡檢司授瑀等官 癸卯順義伯金順卒順瓦刺人舊名阿魯哥失里永樂七年來歸 乙巳升雲南南安州琅井土官巡檢李保爲本州判官先是南安州鄉老言本州俱是羅舞和泥烏蠻種類因無土官管束多致流移近因本州缺官委保署州事蒞政公勤民皆向往流移復歸如蒙升任本州土官甚慰民心 上曰古人爲治在順民性遂以保爲南安州判官 置騰衝千戶所吏目一 丙午陝西按察副使鄺瑩應天府尹 巡按山東御史及都布按司奏衛青原領捕倭馬步官軍通三千八百四十餘人除登州等處往來操備外每歲至夏分戍即墨等三處今議官軍宜令常於其地操備更不聚於登州如有緊急互相應援仍令青總督其事所需糧草皆於旁近州縣應納官者給之庶勢力

不分軍民兩便從之 丁未以北京行在太僕寺馬五千匹給神機營操練軍士置雲南東倘長官司仍隸緬甸宣慰司時緬甸宣慰昔得謀欲殺當蕩頭目新把的奪其地新把的遣子莽只來朝貢象馬方物奏乞置司授官庶免侵殺之患從之遂置東倘長官司就命新把的爲長官

十月庚戌置雲南曲石高松坡馬緬三巡檢司 初瓦甸長官司言

曲石高松坡馬緬其地山高林深寇盜出沒人民不安乞置巡檢司以通事楊資楊中范興爲巡檢下三司命資於曲石中於高松坡興於馬緬 置雲南鈕兀長官司鈕兀五隆諸寨在和泥之地時其酋任者陀比等朝貢至京皆奏地遠民蕃請設官授職以總其衆行在兵部請併五隆於鈕兀設鈕兀長官司從之遂以任者爲長官陀比等爲副 置雲南麓川平緬夏刺驛土官驛丞一

癸丑廣西恩丞州知州趙福惠遣族人趙文四川石柱宣撫司舍

人冉才英等來朝貢馬 以木邦麓川平緬緬甸三宣慰司孟定  
景東烏撒三府威遠廣邑鎮康灣甸南甸大候騰衝七州潞江安  
撫司平崖茶山瓦甸孟璉四長官司土官各貢象馬方物遣內官  
雲仙等往撫之時木邦宣慰罕門法奏麓川平緬宣慰使思任發  
等據占境土思任發及緬甸宣慰莽得刺亦奏罕門法稱兵入境  
侵犯孟璉長官司復奏孟定府侵占其地命沐晟及雲南三司巡  
按御史明與剖決復立孟養官宣慰司以故宣慰刀孟旦子刀孟  
塾爲宣慰及同知刀玉賓同撫軍民如舊貢賦 甲寅置雲南緬  
甸阿瓦驛土官驛丞一賜暹羅使臣坤思利弗等綵幣羅絹綿布  
及金織襲衣有差廉從賜胖襖等物 建州衛指揮僉事哈刺來

朝 廣西左布政使童謨卒

字尙宏黃巖人

丙辰蹇義楊士奇

三考皆賜敕獎諭

起復四川茂州知州陳敏仍舊任時敏以親

喪去官本州岳希蓬長官司長官血只同靜州隴木頭長官司長

官並各寨羌民陳敏到任撫恤州民制馭生番然得各得安業願  
令本官復任 己未置雲南騰衝州僧正司僧正一以土僧爲之

行在刑部左侍郎樊敬卒

郡城進士

庚申吏部右侍郎致仕

王讓卒

益都國子生

丙寅迤北頭目伯顏帖木耳阿的迷失等

土魯番城回回伯顏帖木耳等來歸奏願居京自効令有司給房  
屋器物如例 改雲南金齒永昌千戶所爲潞江州隸雲南布政  
司以千夫長刀珍罕爲知州刀不浪班爲同知 滿刺加國王西

里麻哈刺者率家屬來朝至南京上以天寒令於南京休息加厚  
待之俟春暖來朝別遣人齎敕勞王賜王及妃并頭目 平江伯  
陳瑄卒 合肥人 丁卯朝鮮遣許之惠等來朝貢方物 恭順侯

景克忠奏家口衆乞於北京倉支米三分命於北京支米二千石  
不爲常例 戊辰泰寧衛指揮使火脫赤兀者左衛指揮僉事阿  
哥等來朝貢馬 庚午哈密打刺罕火者阿老丁雲南置通縣把

事高泰等來朝貢馬 辛未置雲南潞江州吏目一設本州清水  
關巡檢司置土官巡檢一 乙亥命工部及浙江江西福建廣東  
四布政司鑄宣德通寶錢十萬貫 丁丑泰寧衛都督僉事拙赤  
遣指揮僉事杻林烏思藏國師乃爾丹達你麻結的等來朝貢馬  
戊寅命劉廣劉昭問罕東番寇劫殺使臣之罪朝廷遣中官齎  
敕及賜幣使西番千戶吉祥同安定衛指揮虎都卜花以兵護送  
至亦党爲罕東衛番寇割兒加等所邀殺傷官軍劫奪勅書賜幣  
及駝馬器械 乙卯哈密等處打刺罕兀思答馬黑麻忽先撒馬  
兒罕打刺罕亦速等來朝貢馬

十一月癸未賜泰寧等衛都指揮使火脫赤等一百二十人鈔幣絹  
布及紵襲衣等物有差 甲甲湖廣保靖軍民宣慰司土官舍人  
彭南木處建州衛僧出思班等來朝貢馬 乙酉升署右軍都護  
僉事指揮同知王瑜爲都指揮僉事充副總兵專督餉運 賜朝

鮮五經四書大全諸書 丁亥敕山雲爾前奏慶遠府莫往吉利  
等峒賊首韋公穠黃公帳等五千餘人流劫已命隨宜處置今南  
丹州又以爲言朕俟捷奏毋致寇滋 戊子朝鮮遣朴安臣等貢  
馬及方物 羅次縣知縣土官楊巫遣姪英等來朝貢馬 行在  
都司奏以宣府各衛所及山西行都司天成等衛旂軍月糧定作  
一例有家小者月支米六斗無者四斗五升老幼三斗從之 壬  
辰廣西泗城州土官知州岑豹遣族人岑亦力把里扛罕刺阿力  
等來朝貢馬 癸巳江西械至長河峒寇首朱南鵬斬於市 己  
未開平哨備都指揮僉事汪貴奏請如舊設隰寧閔安威虜環州  
四堡撥軍瞭守令陳濬熟計具實以聞 辛丑湖廣麻寮千戶所  
故土官舍人向宣來朝貢馬 乙巳罕東衛番人納麻失加瓦刺  
韃韃苦出迤北和寧王部屬把禿不花者顏帖木兒等來歸皆奏  
願居京自効命爲所鎮撫等官 丙午升泰寧頭目脫火朶顏都

指揮同知完者帖木兒福餘指揮同知火兒赤俱爲都指揮使

丁未改雲南金齒廣邑州隸雲南布政使司以前永昌千戶所百戶莽賽爲州同知 戊申阿魯台遣使臣賽的卜顏不花來朝貢馬

十二月壬子劉廣奏胡寇犯涼州永昌遣涼州指揮使李榮等追擊至亦卜刺山敗之斬首寇咎卜父子及其黨八十餘人升榮都指揮僉事 甲寅西寧衛刺麻顏眞星吉烏思藏必力工瓦完卜管著兒監藏等來朝貢馬 清平侯吳成卒初名買驢遼陽人洪武

二十一年歸附 太子太師掌戶部事郭資卒

字存性武安進士

追封湯陰伯諡忠襄 丙辰赤斤蒙古衛宗思答兒等來歸居甘州命宗思答兒爲百戶餘俱爲所鎮撫 庚申置山陰守禦千戶所馬邑守禦千戶所吏目各一 迤北韃靼等俺克等來歸命爲千戶等官 癸亥命金吾等衛百戶劉祥率官軍五十一人往烏

思藏公幹賜鈔及金織綜絲衣袖有差 甲子命鄭亨發軍士五千人譚廣發軍士七千七百人支獨石倉糧料一萬二千七十石運赴開平仍遣官軍護送 乙丑岷州衛刺麻剗掛監藏等來朝貢馬 置山西解州長樂巡檢司於場添設 丁卯陳濬奏獨石乞留三百人守城別於蔚州等衛調三百人代往開平從之 戊辰安定王亦樊丹遣弟却失加黑色阿端衛指揮卜答虎遣弟把都卜花的里木地刺麻堅著兒罕東衛故指揮綽兒吉子川班兒加革巴族使臣領占黑巴等來朝貢馬 廣濟長淮二關減副使二船少稅不多 庚午和寧王阿魯台使賽的卜顏不花等陛辭勅阿涼州之寇於國家無大損宜申嚴約束令部下之人安分循禮庶幾永遠相安 巡按山東御史張聰言遼東之地南拒倭寇東連高麗北控胡虜兵政不可不修陳所宜四事一軍士在戍者少亡匿者多乞敕軍衛修舉兵政守法奉公仍選老成公廉文官

鎮守山海設法盤詰巡捕二不許擅立名色剝削官軍三令兵部計議定奪守城把關及探練正軍實數 壬申命赤城備禦指揮萬貴還松潘 四川烏蒙軍民府女官撒茹遣把事來朝貢馬 陝西都指揮同知閻俊有罪謫戍遼東 甲戌遼東自在州指揮僉事阿刺發安樂州故指揮僉事捌苦子牙升加羅菴山國師乃爾丹之徒完卜革刺藏卜等來朝貢馬 行在戶部右侍郎羅汝敬有罪下獄 丙子遣陝西肅州衛指揮章文齋敕撫諭曲先等衛迤北頭目脫歡及福餘衛韃靼脫脫等來歸皆奏願居京命脫歡爲都指揮僉事脫脫等爲試所鎮撫

宣德九年正月乙酉鄭亨等奏近聞虜寇百餘人攜家口至官山近地收放馬困力窮衆不一心請出兵掩捕上曰彼不爲寇惟當撫諭招懷 丙戌諭王驥邊報虜有攜家來依塞下者宜出榜招諭來則處以善地授官給糧賞不來不必強之惟慎防之 丁亥肥

河衛指揮使刺令哈遣指揮僉事牙當嘔罕河衛指揮使乃膝遣  
指揮僉事晏答等來朝貢馬 戊子益實衛指揮僉事失眞哥來  
朝貢馬 庚寅朝鮮遣成抑等來朝 西寧衛禪師鎖南藏卜遣  
其徒刺麻三舟領占等來朝 譚廣奏乞調蔚州官軍於獨石其  
原守開平者如舊從之 丙申岷州衛刺麻班卒星吉烏思藏刺  
麻朶只監藏等來朝貢馬 丁酉戶部議奏今年運糧屯糧及贖  
罪納米事例 一運糧官軍兌運湖廣等布政司蘇松等府民糧  
加耗各如上年例若民自運至淮安瓜州等處兌與軍運者加耗  
四斗 一官軍運糧五百餘萬石以三分爲率通州倉二分京倉  
一分 一蘇松常三府積糧九拾餘萬石以俟北京帶俸軍官支  
給今留在倉請令各官預支今年三月至六月俸糧爲便 一浙  
江江西湖廣并蘇松等府今年稅糧定撥南京各衛倉收者聽以  
土產紵絲布絹絲綿依時直折納 一各部司衛所屯田旂軍除

正糧外餘糧六石納於附近官倉仍照舊比較 一江西湖廣福建罪囚舊於南京納米贖罪者量加米數改發本布政司缺糧去處收受犯死罪流罪及徒三年二年半者各加米二十石徒二年加十五石一年半加十石一年加五石杖一百加五石九十加三石八十七十六各加二石笞五十者加一石五斗四十加一石三十二十一十各如三斗從之 史昭奏韃韃也先帖木兒等歸附勅邊防謹備 增給宣府諸衛神銃二百 戊戌會川衛迷易守禦千戶所故土官副千戶阿袞弟阿你等來朝 己亥朝鮮遣鄭發等來朝貢方物 庚子麗江軍民府故土官木土子森 霑益州土官知州斗南遣把事李英等來朝貢方物 辛丑史昭送降虜也先帖木兒等至京師言韃賊孛的耳麻脫歡沙火的朶羅禿等千餘人駐黃河邊擺力謊忽兒之地又言咎卜所部餘黨欲寇涼州勅劉廣嚴謹兵備 癸卯陳濬卒馬昇充參將率官軍提

督開平獨石長安永寧等處巡哨備禦 己巳岷州衛國師沙加  
令刺麻辛巴星吉石城等衛僉事木答哈朵禿河衛指揮僉事孛  
羅多等來朝貢馬 戊申應天府奏供役頻繁民力不足

二月庚戌設贛州府安遠縣大墩板石信豐縣新田會昌縣承鄉四  
巡檢司流官巡檢各一土官副巡檢各一弓兵各五十人以土人  
劉弘誨爲承鄉副巡檢李梅五爲新田副巡檢仍令大墩等各峒  
人推舉公正二人爲副巡檢巡撫侍郎趙新奏長河峒賊朱南鵬  
等劫掠峒出入有四路請於四路口各置巡檢司防禦 揚州淮  
安鳳陽徐州等府連歲亢旱勅巡撫侍郎曹弘用心撫恤如他處  
有糧悉移賑之一切買辦科征盡行停止 壬子四川長河西魚  
通寧遠等處軍民宣慰司禪師淨智領占星吉刺麻領占遷著藏  
洮州等衛刺麻速南監藏甘州衛僧鎖南領占等來朝貢馬 行  
在戶部奏四川仙泉等井納米中鹽例初方政言松潘等衛軍餉

浩大雖已召商中納鹽糧然地在極邊萬山之中不宜禾黍距成都產米之處千有餘里舟車不通皆擔負而來路費增倍近知仙泉等一十八井見在鹽多及簡縣上流等井附近成都便於客商乞暫以仙泉或上流等井比先坐中之數改撥別井再爲減輕則例專撥松潘邊衛令行在戶部議至是議奏仙泉等一十八井每引納米三斗上流等九井每引納米三斗五升從之 乙卯諭去年南北直隸山東山西河南旱民多飢窘敕寬恤宣德七年二月以前所欠糧草等皆停徵宣德八年夏稅所報災傷去處停免外其中有未報災傷者體勘得實依例免徵 遣肅州指揮同知韋文齋敕往曲先等衛賜指揮那那罕等綵幣表裏有差先是曲先與罕東仇殺民多離散嘗遣文撫之至是撫定復業各遣人貢謝故有是賜 戊午巫凱奏逃軍及家屬多聚萬灘等島欲遣都指揮夏通率兵招捕從之 賑陝西咸陽崇信漢陰 己未鄭亨言

比年北虜窮困咸相率效順其所來者衣裳壞敝肌體不掩及有邊境男婦舊有被虜掠逸歸者亦無衣裳令所司給與衣鞋遣赴京師今來者日衆應備不贍命以大同府雜造局所貯布襖袴鞋給之 庚申上出思賢之詩示羣臣罷築教場 壬戌福餘衛頭目把秃不花兀者衛指揮僉事亦哈出亦馬忽山衛指揮僉事伯乞納泰寧頭目哥帖木兒等率妻子來歸命者完台等三人爲百戶餘皆爲試百戶所鎮撫 給守衛龍門等墩口戍卒二千餘人毛襖狐帽以雲南瓦甸長官司隸雲南都司 移辛汪寨巡檢司於長峯寨溫泉鎮巡檢司於古峯寨威海衛指揮僉事陶敞言移置於備倭爲宜 朝鮮遣陪臣南暉等貢馬及方物 鄭亨卒追封潭國公 丙寅播州宣慰使楊昇湖廣散毛宣撫司于斌嘉河衛野人乃刺秃來朝貢 升遼東都指揮僉事裴俊爲都指揮同知餘指揮千百戶答隆哈等升職有差以招諭遠夷功 泰寧頭

目干帖木兒爲都指揮同知 福餘頭目把禿不花爲指揮僉事  
戊辰軍民人等自願運米隨去開平中納鹽糧者舊糧二斗五  
升 減作一斗五升 辛未罷右軍都督府左都督陳懷 蘇門  
答刺國王弟哈利之漢朝貢至京以疾卒贈鴻臚少卿治喪葬  
壬申曹儉管征西前將軍印一切事務提督 兀者衛指揮僉事  
猛可禿等三人隨內官亦失哈歸自奴兒干賜綵幣等物 癸酉  
雲南馬龍他部甸長官司故副長官普賜弟寧等來朝貢馬 升  
建州左衛都指揮僉事凡察爲都督僉事仍掌衛事餘升缺有差  
先是都指揮裴俊往幹木河招諭遇寇與戰而衆寡不敵凡察者  
率衆往援有功故超升之 行在戶部奏楚雄府大有倉見在糧  
少不足以給南安廣運二銀場礦夫口糧乞招商中納本處安寧  
等四井鹽糧每引納米二升從之 淮安府清口驛至徐州房村  
等八驛止設驛船撥淮安金城驛至山東蓬萊等十八驛馬驛十

分之三於八驛帶管遞送一年一更 甲戌賜畢述力江等處革  
巴等族頭目領真黑巴並招撫回京安定等衛指揮使虎都卜花  
等鈔及綵幣襲衣絹布有差 楚雄府黑石江及泥坛村銀場軍  
民盜礦千百爲羣各執兵攘奪 癸未貴州宣慰使安中遣把事  
胡岷等來朝貢馬 甲申通州繕倉五軍神機營官軍萬人仍回  
操備 山雲奏黎利已卒長子狂妄次子幼弱姦臣黎察竊權構  
黨恣相仇殺良民驚懼諒山府脫縣等土官阮世寧七源州土官  
阮公庭各率家屬及部下三百餘人避難來歸願於廣西龍州及  
太平府上下源州居住勅加意綏撫隨便居住  
三月乙酉琉球國王鄭長等奉表箋貢馬及方物 遼東都指揮同  
知裴俊招諭外夷還 丁亥岷州衛高僧劄藏牟樂幹等來朝  
中軍都督僉事初英卒 儀封人 戊子阿倫衛指揮僉事亦省哥  
亦里察河衛指揮同知哈刺等來朝貢馬 辛卯巡撫福建御史

黃振奏漳州指揮覃庸等私通番國事覺籍沒 甲午山雲奏勦  
潯柳二府及思恩州餘寇斬首七百三十六級 丙申實授知府  
李郁爲行在兵部右侍郎 魏源行在刑部左侍郎支從二品奉  
戊戌賈諒奏四川獲強盜一百三十一人 己亥馬昇奏隆慶  
左衛初撥官軍五百人於獨石備禦請留神銃手九十二人餘悉  
令守雲州又請以蔚州等衛官軍三百人於赤城雕鸞守備留開  
平等衛官軍三千三十二人守獨石從之 庚子命西寧衛百戶  
劉浩往罕東衛的里木之地以刺麻葛刺卓兒爲禪師頭目管思  
巴的思阿失加等爲千百戶 黃振奏西洋山等處海洋有寇船  
二十一艘至長門洋劫掠連江縣民所運糧米等物 辛丑龍谿  
縣強賊六十人往來龍谿南靖兩縣殺人劫財指揮鄒玉捕之爲  
所殺 壬寅行在兵部右侍郎王驥本部尙書 洮州衛臨藏江  
刺麻速南藏卜岷州衛刺麻劉藏等來朝貢馬 命行在錦衣衛

指揮使王裕監察御史張琦往安慶等處巡捕盜賊 命迤北歸  
附韃官指揮僉事塔木不歹子脫脫不花代職於錦衣衛帶俸

丙午琉球國王遣使者義魯來朝貢馬 丁未大同參將都指揮  
使曹儉奏僉事許彬等以榜招諭賊虜於單于城有徑入虜營不  
還者彬等領兵至東勝虜奔入山

四月戊申置隨駕御馬監御馬倉大使一副使一 命安定衛指揮

同知伯顏沙子昆都失等襲職 所鎮撫拜不花以護送使臣往

畢力朮江遇寇被害命其子阿奴速襲升副千戶從安定王亦樊

丹奏也 命行在錦衣衛指揮僉事丁全等賜福餘等衛都指揮

同知安出等四十二人綵幣表裏有差 給紫荊關等處運木軍

夫二千人口糧 辛亥雲南老撾宣慰使刀纜掌及孟良府土官

知府刀光進等遣頭目混論等來朝貢馬及金銀器皿 朝鮮遣

李士信等來朝貢 置温州瑞安縣池村巡檢司平陽縣雅陽巡

檢司各置巡檢一弓兵一百 毛憐衛都督僉事撒滿答失里母  
金阿納失里等來朝 癸丑設畢力朮江衛指揮使司畢力朮江  
在西番中國使者往諸番皆由其地頭目管著兒監藏等迎送有  
禮故立衛給印以管著兒監藏阿黑把爲指揮僉事其餘爲千百  
戶者二十一人遣西寧千戶吉祥等齎敕往賜管著兒監藏等綵  
幣表裏有差 丁巳廣東昌化縣黎首趙克寬等來朝貢 戊午  
諭招撫曲先功西寧等衛官軍凡三次往者升一級未及三次者  
俟再有功則升惟罕東指揮僉事綽班兒加有功二次升一級以  
其遠人特優之 置貴州鎮遠州倉大使副使各一 徐琦等自  
安南歸黎利死利子麟遣頭目隨琦等來告奔喪且獻金人及方  
物 庚申建州左衛都督僉事凡察奏去年野人木答忽木冬哥  
哈當加等糾合七姓野人寇掠殺死都督猛哥帖木兒及其子阿  
古等請發兵問罪遣指揮僉事施者顏帖木兒等敕同建州左衛

都督同知札刺兒往諭木答兀等且赦其罪凡所掠人馬貲財悉令追還仍與凡察解仇通好 辛酉哈密遣百戶撒刺湖廣高羅安撫司舍人田貴等來朝貢馬 壬戌沙州衛韃靼奄克帖木兒泰寧衛僉事賽音帖木兒肥河衛僉事歹羊加等來朝貢 和寧王阿魯台遣頭目土魯台薛別孫來言爲瓦刺所敗今脫身走父子兄弟不復相顧遣錦衣衛百戶馬亮馳往撫諭 行在戶部奏宣府所儲甚少若以山西及高山衛平定州守禦千戶所官吏軍民犯罪者改於宣府萬全衛倉納米爲便從之 甲子貴州安順府土官同知阿寵遣寨長的蕭等來朝貢 乙丑滿刺加國王西里麻哈刺者及其弟刺殿把刺頭目文旦等來朝貢 戊辰行在工部右侍郎羅汝敬坐受賕免死充爲事官仍提督陝西屯田 壬申行在刑部奏北直隸諸處納米贖罪例雜犯死罪納米五十石流減十石徒三年納米三十五石餘四等遞減五石杖一百

米十石餘四等遞減一石筭五十米五石四十五石遞減一石二十比三十減五斗一十又減五斗其有力運納者山東輸濟寧德州臨清等倉北直輸各府倉 沙州衛掌衛事都督僉事因即來等奏數爲罕東衛韃靼及西番侵取人畜阻隔道路不能安居乞容於察罕舊城居住敕但安分守法保境睦隣何必東遷西徙自取勞悴又敕罕東及西番果嘗侵奪沙州人畜悉追還之 丙子阿魯台所部孛羅不花等率妻子來歸 秦寧衛頭目脫脫不花來朝願居京自効命爲千百戶

五月己卯遣行人郭濟朱弼往安南賜祭黎利頭目安南黎傅等陞辭賜鈔幣爲道里費 行在刑部奏貴州納米贖罪事例貴州按察使應運平言貴州所轄地方悉是蠻夷刀耕火種納糧不多軍衛屯田儲積亦少請貴州三司并所屬官吏軍民除眞犯死罪強盜不在贖例其餘笞杖徒流雜犯死罪依在京事例減輕納米至

是議雜犯死罪三十石流罪減五石徒三年二十石以下四等遞減二石杖一百十石以下遞減一石笞五十四石以下四等遞減五斗上以貴州邊遠笞罪比今例各減一石餘從所議 辛巳端午節賜羣臣扇及宴 雲南浪穹縣鳳羽鄉巡檢土官巡檢尹宗孫瑄等來朝貢 癸未暹羅國王悉里麻哈賴遣使臣坤思利刺者萬直等來朝貢 鬱林及博白等縣蠻賊劫殺人民官軍緝捕者亦被害民皆逃竄勅山雲及廣西三司督軍捕之 甲申置嘉定州犍爲縣石馬灘巡檢司巡檢一以地險常有盜賊 己丑河南按察使朱仲安卒 壬辰武清縣小直沽巡檢司遷治於東南高阜之地 癸巳廣西右布政使周幹本司左布政使九載考績乙未敕責巡按浙江御史王憲及三司官捕賊以賊殺死百戶尤寶 宜黃縣官田租折納土產苧布 丙申貴州金筑安撫司及上馬橋等長官司遣頭目蔣政等貢馬 庚子起復行在禮部

右侍郎吾紳至改南京刑部 行在戶部奏旂軍屯田宜令邊境  
衛所什三守城什七屯田內城衛所什二守城什八屯種

六月丙午占城國王遣使臣逋沙帕時勞辦等貢方物 己酉施州

衛高羅安撫司之木柵長官司以高羅倚勢陵轢侵奪其地乞徑  
隸施州衛從之 壬子授巫英遼東廣寧衛指揮僉事英凱之子

時上聞凱中流矢傷足諭兵部宜官其子使從凱練習 迤北韃

靺朶魯禿伯胡等來歸命爲副千戶等官 癸丑升焦禮范斌馬

敬俱爲都指揮僉事仍於遼東領隊哨備從巫凱請 築薊州澱

流黃臘蝸等處隄岸 甲寅朶顏衛指揮哈馬歹等七人來歸

丁巳江西左布政使孟桓罰役贖罪 戊午陞山雲右軍都督同

知賜紅羅衣一襲 庚申遣朱勇胡湊持節封釋迦也失爲行妙

明眞如上勝清淨宏照普應輔國顯教至善大慈法王西天正覺

如來自在大圓通佛 勅諭廣西征勦蠻寇官軍有功將士荊州

衛指揮僉事許輔升指揮同知署湖廣都司都指揮僉事仍領軍  
廣西操備 辛酉雲南車里靖安宣慰使刀霸供八百大甸宣慰  
使刀招散等鎮沅府土官刀騰子安楚雄府女土官同知高冬梅  
遣姪貴四川鹽井衛土官千戶八的抄子八如非西番僕士得刺  
麻速納藏等貢金銀器皿象馬等方物 壬戌命哈密差來阿討  
刺爲指揮僉事 姚安軍民府土官知府高賢遣姪官音禾等貢  
方物 甲子升序班安寧行在中書舍人仍隸翰林譯夷書 丁  
卯建州左衛指揮使塔察兒木速河衛指揮同知捏哈答山衛指  
揮同知扎令加福餘指揮把事脫脫不花東寧指揮僉事乞冬哥  
來朝貢 庚午以戶口增多置桂陽縣興寧縣縣丞主簿各一  
北京渾河水決東崖至小屯廠 辛未免青州等府因旱澇逋欠  
糧草

七月丁丑以北京行大僕寺馬二千餘給大同軍士操備 癸未琉

球中山王尙把志蒙賜衣服海舟遣使者楊布勃也等奏貢馬及  
方物謝 遼東自在等州女真指揮僉事鬼密等貢馬 甲申增  
騰驤右衛指揮同知一 武驤左右二衛中左中中二所騰驤左  
衛中中所副千戶各一 騰驤右衛前後中左中右四所百戶各  
一時諸衛奉御馬坊非一所而監牧官少乞調金吾諸衛舊在御  
馬監領牧千百戶十員爲助上從之 大名廣平鳳陽等府蝗  
戊子貴州樂平長官司舍人宋瑄可令河等衛指揮僉事阿古善  
東寧衛居住千戶阿里景加等來朝貢馬 己丑遣使賜八百大  
甸宣慰使刀招散車里靖安宣慰使刀霸供孟良府土官知府刀  
光等 壬辰吉河等衛指揮僉事阿里哥等來朝貢馬 乙未修  
北京城垣 丙申肥河等衛指揮僉事兀察兀魯罕河衛指揮僉  
事脫木哈福餘等衛千戶勒克等來朝貢馬 虜中歸附言阿台  
朵耳只伯失捏干等欲率衆掠涼州甘肅敕劉廣等嚴飭兵備

劉廣等奏虜人割買等二人來歸恐非實意勅且處之甘肅徐察其心 戊戌兀者左衛指揮僉事柳溫哥嘔罕河等衛指揮僉事脫因帖木兒等來朝貢 劉廣奏罕東念剉族番寇割兒加等服罪 初割兒加殺傷朝使劫奪勅書命廣及劉昭等討之廣昭會議先遣指揮邢賢以輕騎百餘覘寇所止然後進兵賢以密羅族指揮怕尼爲向導行月餘渡畢力朮江抵普祿之地遣人招諭之割兒加前告曰本與安定有惡不意誤犯朝廷請還所得勅書等物貢馬贖罪賢撫諭之使還故處遂以其頭目薛帖木兒偕來勅廣等善撫之 壬寅雲南頂營長官司故土官長官阿庸子珩鶴慶軍民府劍川州故土官千夫長趙海子瑛嘉河衛指揮僉事忽失苦等來朝貢馬 修臨桂縣東西七里河閘 癸卯迤北韃靼亦兒友率其子來歸命爲百戶

八月乙巳哥吉河衛指揮同知未稀納刺蘭吉衛指揮同知我可哥

福餘衛副千戶阿林台等貢馬 戊申可令河衛指揮僉事伯里哥禿來朝奏願居遼東東寧衛從之 修北京青龍橋及順承等門橋閘 復遼東都指揮僉事黃順職 酉陽宣撫司奏所屬後里溪洞數被施州衛大田所刺惹洞蠻向刺惹等侵暴殺人掠財 勅蕭授及四川三司遣官撫諭 庚戌武昌等府荒歉以湖廣秋糧之當兌運者四十四萬餘石及當赴南京輸納者準令折收豆粟小麥存留本處以備賑濟 壬子遣金吾右衛指揮僉事孟捏可來送朝鮮國人金香伊等還國香伊等十二人爲忽刺溫野人沙隆加等所掠國王以聞上遣孟捏可來等追索惟存香伊等四人遣送歸國 癸丑調遼東都指揮僉事黃順任山西都司 馬昇奏赤城雕鶻二堡糧餉俱缺乏令萬全都司發軍於宣府倉運米給之龍門所六千石赤城六千石雕鶻三千石仍乞令山西附近州縣增運宣德九年秋糧以備軍餉從之 乙卯四川威州土

官董志均孫泰等來朝貢馬 丙辰行在錦衣等衛指揮僉事丁  
全等五十八人奉使泰寧等衛還 丁巳升楊溥行在禮部尙書  
仍兼學士 起復行在刑部右侍郎白勉南京刑部右侍郎 石  
城等衛指揮僉事安若幹朶里衛指揮僉事帖木兒哈頭目哈納  
的等來朝貢 四川按察使康郁罰俸三月 戊午益實等衛指  
揮同知得隆哥嘉河等衛指揮僉事忽申八等來朝貢 己未扎  
童等衛指揮同知安沖加撒只刺河等衛指揮同知損吉等來朝  
貢 行在都察院右僉都御史凌晏如卒 歸安人 庚申泰寧指  
揮同知忽禿不花等奏事至京 給大同所轄烟墩營堡瞭望軍  
士毛襖 辛酉江西左布政使孟桓致仕潯縣大學生 壬戌遼  
東定遼左右中前後五衛水沒田苗 癸亥嘉河等衛野人乃刺  
禿遣頭目安沖加兀里 奚山衛指揮僉事木當加 弗提衛僉  
事柳失哈等來朝貢 甲子敕湖廣河南江西遼東南北直隸衛

府州縣亢旱災傷今年官民田地秋糧及屯種子粒以十分爲率俱免四分 乙丑江西永豐等縣亂民夏九旭等據大盤山立寨招誘流民三千餘人抄掠旁近請發兵勦捕遣魏源賚敕往諭又遣都督任禮率兵繼其後 丙寅敕劉廣等撒馬兒罕及諸外夷使回不許挾帶中國之人及買中國童幼出境 戊辰石城衛野人未朶幹遣撒义河衛指揮同知喃都楚雄府把事段忠 定遠縣把事王常等來朝貢 選習四夷譯書學生王瑄馬麟等三十人命指揮李誠丁全等散之月支米一石光祿寺月給飯食習一年能書者與冠帶 修治桑乾河橋梁 敕史昭等曰今降虜皆言阿魯台已爲瓦剌所殺部屬分散有渡河而來依我邊境者宜整兵巡邏果其來附善加撫待瓦剌脫歡旣殺阿魯台必自得志或來窺邊不可不備 己巳瓦剌順寧王脫歡遣使臣昂克等來朝貢馬且告已殺阿魯台以前元玉璽來獻 雲南車里宣慰使

刀霸羨遣頭目召京羅次縣鍊象關巡檢司土官巡檢王源等來朝貢象馬 左軍都督僉事鬼里卒其先永平人洪武中歸附庚午敕劉廣降虜多言阿魯台已死其故所立阿台爲王者欲依涼州境外避匿惟堅兵慎防之 虜入榆林莊及陽和口搶掠牛馬 壬申廣寧衛召商於本衛倉納糧不拘資次於淮浙等處支鹽淮浙每引米豆五斗山東福建廣東四川俱二斗從之

九月乙亥行在戶部奏陝西行都司各衛倉客商中納鹽糧及囚人納米贖罪者多有欺弊請令商人俱於黃河以南臨洮鞏昌等府糶米運至河橋等巡檢司盤驗渡河上倉仍於行都司出給勘合齎送布政司報數稽考其行都司所屬罪囚亦令將定擬收過米數具報布政使庶革侵欺以實邊從之 丙子守居庸關指揮使高迪奏今各關口軍士多者十一二人少者八九人不足守禦且外夷貢獻往來皆當接送而人力寡少請勅所司增軍命法司有

犯充軍罪者發千人益之 南京禮部尙書張瑛父卒葬畢起復

視事 貴州都司奏貴州宣慰司所管谷王舟等六寨 西蠻夷

長官司所屬十四坪底等十三寨及四川播州草塘安撫司留坪

等處苗賊數聚出劫殺掠人口敕蕭授及貴州三司各遣官體察

戊寅四川汶川縣番僧溫卜燕旦監藏等來朝貢 庚辰上將

率師巡邊命郭玆宋瑛袁禎都督張昇李英掌行在五軍都督府

事 行在吏部尙書郭淮兼行在工部事 行在右都御史熊概

兼刑部事 少師蹇義等扈從命給隨駕軍士及軍官胖襖綿袴

各一鞵鞋二 實山衛指揮僉事阿里哥 四川伽木隆國師釋

夏監藏遣番僧溫卜等來朝貢馬 壬午屯河禿者等衛指揮同

知失郎加等及瓦剌使臣打刺罕哈里等來朝貢駝馬 黃淮陞

辭賜詩及鈔二千貫 宥河南左布政李昌祺罪 癸未車駕發

京師駐驛唐家嶺 甲申駐龍虎臺 乙酉度居庸關駐岔道

丙戌獵 丁未獵 戊子駐懷來 乙巳駐雷家站 庚寅駐宣

府之泥河 辛卯駐萬全 癸巳令萬全都指揮黃真於洗馬嶺

及西陽河預治橋道 甲午後軍右都督譚清卒 大興人 乙未

故和寧王阿魯台之子阿卜只俺等喪敗無依遣頭目伯木兒等

來朝請歸附上憐之遣指揮晏英等撫納 丙申駐安家堡 丁

酉駐洗馬嶺 戊戌江西按察使童寅卒 隨州進士 己亥獵

庚子回鑾 辛丑駐宣府之泥河 壬寅駐雷家站 癸卯駐懷

來

十月甲辰駐龍虎臺 享太廟衛王瞻埏奉命行禮 乙未駐唐家

嶺 丙午至京 永豐縣賊夏九旭等就擒 丁未山西行都司

奏虜五十餘人入長城東溝遣署都指揮僉事史直領兵擊之斬

首十餘級 甲寅命黎利子鑿仍權署安南國事命侍郎章廠等

齎勅往諭之 廣州府府吏董琬爲廣西懷集縣典史以招撫西

家等獠首二百一十五戶 行在右都御史熊概卒 乙卯四川  
長河魚通寧遠等處番僧刺麻班丹噶刺等來朝貢 劉廣奏獲  
到虜寇言今年二月瓦剌脫脫不花王子率衆至哈海兀良之地  
襲殺阿魯台妻子部屬及掠其孳畜阿魯台與捏失干止餘人馬  
萬三千徙居母納山察罕腦刺等處七月脫歡復率衆襲殺阿魯  
台捏失干其部屬潰散阿魯台所立阿台王子止餘百人遁往阿  
察禿之地完者帖木兒遂南行至哈刺脫歡山爲寇遣千戶王敬  
等領兵追之斬首十餘級生擒完者帖木兒及男婦二十人械送  
京師 丙辰張駿行在左僉都御史 松潘疊溪所轄西北任昌  
巴諸黑虎等寨梗化攻圍關堡搶掠客商方政等率官軍土兵分  
道而進攻以兵三百擊西北大寨破之貴督兵四千餘破伍昌大  
寨都指揮趙得宮聚等各進兵以次討平龍溪等三十七寨前後  
斬一千七百餘級寇帖伙招撫潰散逋亾者復業遂班師以四川

官軍五千分守舊有關寨升政貴皆爲都督同知以龍州爲龍州  
宣慰使升土官知州薛忠義爲宣撫以土官同知李爵爲副使判  
官王爾干爲僉事茂州土官長官猶恭爲安撫仍準長官司事俱  
以從征有功 松江府旱田穀少收起運折糧大小棉布一萬五  
千九百二十五疋赴京共淮米一萬六十石 革雲南車里靖安  
宣慰司復車里軍民宣慰司洪武中嘗設車里軍民宣慰司命土  
刀邏達爲宣慰使死子刀更孟襲死子刀霸羨幼叔刀怕漢借其  
職死其弟婦前夫之子刀弄吏不服逐刀弄而軍民宣慰司遂革  
永樂十七年別設靖安宣慰司命刀霸供爲宣慰使宣德六年刀  
霸羨既長請於朝襲父職復設車里軍民宣慰司至是刀霸供言  
靖安即車里舊地若析爲二下人必有爭奪之患乞仍併爲一歲  
貢如例從其請遂革車里靖安宣慰司復設車里軍民宣慰司刀  
霸供刀霸羨皆爲宣慰使且俾上所授靖安宣慰司印信金牌

行在兵部奏朝廷於廣寧開原立馬市置官主之以便外夷貿易無敢侵擾之者凡馬到市官買之餘聽諸人爲市近聞小人或以酒食衣服等物邀於中途或許張事勢巧爲誘脅甚阻遠人向化之心請揭榜禁約從之 巡按陝西御史劉敬奏九月十九虜寇朶兒只伯等竊入涼州至城東及雜木等處指揮楊斌率兵與敵擒寇一人卜魯罕虎里餘寇遁 己未方政奏便宜四事 一威州移復舊處 一黑水阿容等寨招諭已出隨渠不齊梭城等寨亦望風歸附惟雜穀安撫司未復已遣人招撫 一威州守禦副千戶魯明等三人皆老成堪任請調掌威州守禦千戶所吳迪還原衛 一松潘軍民指揮司開設醫學皆從之 辛酉置西寧軍民指揮使司醫學正科一員澂江府醫學正科一員 漢中府褒城縣開山青橋鳳縣安山武關驛驛丞各一員四驛洪武中設未置官以鄉老署驛事至是始銓注官吏 癸亥依木河等衛指揮

同知朵多卜忽禿河衛指揮同知忒等吉等來朝貢 甲子西寧  
衛刺麻湛藏 烏思藏鎖南剗思等來朝貢 馬昇奏虜至獨石  
北衝路口守備百戶劉政領兵追至北沙溝斬首八級生擒男婦  
八人械送至京 罷陝西買馬命以平涼甘肅二苑馬寺馬給軍  
士 召方政還敕副總兵左軍都督同知蔣貴佩平蠻將軍印充  
總兵官 土魯番城舍人卜烟川兒等率妻子來歸奏願居京自  
効命卜烟正兒爲正千戶卜烟川兒者已故都督僉事尹吉察兒  
之子初尹吉察兒居土魯番城爲歪思王所逐歸附來京授都督  
僉事至是卜烟川兒來歸且告襲職故有是命未幾升卜烟川兒  
爲指揮僉事而以其部屬捨黑馬黑麻等五人爲試所鎮撫 行  
在翰林學士沈度卒 華亭人 丙寅史昭奏虜寇孛的打里麻等  
犯邊遣指揮王勇等率兵擊之至闊台察罕之地生擒虜男婦四  
十人送京師 丁卯敕湖廣浙江江西南北直隸衛府陝西福建

廣東貴州四川廣西雲南凡全家充軍並絕戶田地召人承佃官田俱照民田起科免征所欠糧草府州縣見收稅課及爲鈔法增收諸色課鈔減十之四逃民所欠及見征糧草皆停征招撫復業蠲免糧差亦如之 雲南按察使蹇賢爲湖廣左布政使 辛未賜罕東衛倉劉族頭目薛帖兒加所遣弟俺班等 壬申敕緣邊總兵鎮守官曰今西北胡虜敗者離散勝者驕縱惟嚴兵保境寇來則戰寇退勿追彼於境外往來勿貪功輕動 癸酉朝鮮遣朴信生等賀太子千秋

十一月丙子陝西疊州升朶族土官千戶板的失綽等來朝貢馬阿魯台部屬把塔等率家屬八十九人來歸願居京命把塔爲正千戶餘爲副千戶所鎮撫等官 戊寅置四川龍州宣撫司經歷司經歷知事各一 改龍州武平驛小河驛水遞驛小溪驛古城驛隸龍州宣撫司 烏思藏喇嘛鎖竹陝西岷州衛僧班官藏卜

等來朝貢馬 己卯敕巫凱凡夷人有鬻男女者官給與直悉送京師育之 壬午亦弗思罕回回迷兒阿力等來朝貢駝馬 失里木衛指揮僉事款直來朝奏願居開原自効從之 肅州衛指揮同知胡祺等率兵巡哨至昌平頭墩見虜蹤跡追躡之至窯兒站遇虜與戰虜奔潰 丙戌百官及四夷朝使賀皇太子於文華殿 丁亥洮州衛國師領占藏卜遣其徒公哥藏卜等來朝 己丑臨洮衛土官都督僉事趙安及遼東安樂州故韃官指揮僉事阿升哥妻董氏等來朝貢 行在戶部奏衡州長沙二府倉有糧一百五十萬石請令缺食州縣關給賑濟 庚寅上初聞木蘭河等衛指揮兀若里等言黑龍江七姓野人議侵朝鮮至是朝鮮使還敕諭嚴備並以備倭官軍所得朝鮮人歸之 壬辰鞏昌衛土官指揮同知董儁遣百戶洪春等來朝貢 甲午西寧衛國師鎖南兒監參遣禪師鎖南領真完卜刺麻剌真堅藏等來朝貢馬

乙未瓦剌使臣昂克爲都指揮同知猛哥帖木兒爲指揮僉事

丙申四川合州吏目熊鼎爲本州同知州有強盜劫民財燬公廨  
殺傷官民鼎至廣安州率兵往蹤跡之獲盜六十七人 戊戌以

事繁增順天通州遞運所副使一 庚子併貴州新化府入黎平

府以新化湖耳亮寨甌陽歐中林驗洞龍里赤溪瀟洞七蠻夷長  
官司皆隸黎平府以地狹民稀 戶部尙書兼謹身殿大學士陳

山卒 壬寅遼東石城衛女真指揮同知皮羊加等三人奏事至

京 謫監察御史頡文林戍遼東 癸卯處州衛所屬麗水青田

松陽龍泉縉雲送昌慶元七縣窯冶鉛坑銀坑碓磨油炸磚瓦竈

房地賃錢竹木山租茶課稅契茶行由工墨果價儒學山地租契

木工墨歲徵課銀三千三百四十一兩有奇民貧銀多欠乞勅折

鈔爲便從之

十二月丙午韓王冲燧奏護衛屯軍乞循安府舊例三分守城七分

下屯從之 瓦剌順寧王脫歡使臣昂堯等陛辭命指揮康能送之還並齎敕諭脫歡曰王克紹先志遣人來朝進馬具見勤誠所云已得玉璽欲獻亦悉王意然前代傳世之久歷年之多皆不繫此王既得之王自留用可也 行在戶部侍郎王佐奏與譚廣議廣以爲赤城諸堡地臨極邊宜增守備今欲分調宣府官軍請仍留一千操備而以一千人於雲州諸堡與舊軍相兼屯守千三百人於宣府各衛屯種輸納子粒後有法當充軍皆發雲州諸堡屯守諭王驥曰赤城諸堡宜以蔚州諸衛之在宣府者千五百人益之留千三百人宣府屯種雲州諸堡增軍一如所言 丁未大同參將都指揮使曹儉奏大同右雲川玉林朔州四衛所屬宜遣都指揮僉事劉儼監督天成鎮虜陽和高山四衛所轄宜遣都指揮僉事鄧英總督從之 給大同左等衛夜不收高政等月支米一石 戊申雲南罪囚依在京例納米贖罪 庚戌肥河等衛指揮

女隆加四川泥溪長官把事王鴻等來朝貢馬 虜寇入境開平

衛正千戶楊洪率兵追捕斬三級追還男婦八人 辛亥劉昭奏

比烏思藏闡化王所遣貢使的藏等以朝廷賜物易茶至臨洮臨

洮疑爲私茶拘留的藏等收茶於庫請釋的藏等還其茶命悉如

昭所奏 壬子朝鮮遣李效仍貢馬 雲南元江軍民府頭目李

華等來朝 癸丑廣東道監察御史羅銓爲湖廣按察使 乙卯

朝鮮遣田興等奏表箋貢馬及方物 忽虜愛衛故指揮僉事哈

刺子創加兀刺忽衛故指揮僉事納吉答子土木以朝貢來京皆

命襲職 丙辰命故和寧王阿魯台子阿卜只俺爲中軍都督府

左都督賜第宅什器 行在兵部尙書王驥奏貴州新添衛舟行

長官司故土官羅海男羅朝扇誘寨卜羊集逃民羅阿記等侵占

阿龍番長官龍知保之地又攻蹂平寨焚廬舍殺人劫財請令都

指揮李政躬往其地審實撫諭 曹儉奏虜入黃土山又至沙嶺

北溝 劉廣奏北虜脫火赤等三人至甘州言朵兒只伯率衆三千駐也林察兒舟之地去涼州千餘里已絕糧欲來朝歸附上謂王驥曰虜言不可信朵兒只伯必不來宜戒邊將嚴守備 庚申西寧衛土官都指揮僉事李 兀者衛指揮同知阿里吉結等來朝貢馬 曹儉奏虜至響水河及沙嶺大同右衛副千戶梁智等追之寇遁 辛酉王驥奏虜酋朵兒只伯假息寨下無所依歸宜亟遣人招撫勅劉廣遣人同脫火赤等往諭之 順寧府土官知府孟蓋弟岫土官千戶長阿多來朝貢馬 癸亥甘州回回哈只火者等來朝 廣東欽州奏本州貼浪如昔二都與交趾萬寧縣接境比因黎利叛逆都民黃寬等爲所迫逐寇掠民財撫之不從命廣東三司巡按審度便宜處置 甲子上不豫 乙丑西寧衛巴沙等族國師禪師賈鎖西納等族指揮列即答兒遣頭目來朝貢馬 巫凱奏廣寧操備官軍不時調用難以遣歸屯種其各

官家屬所種之田可如例起科每畝納米一斗以備邊餉上從凱言 山雲奏潯州等府蠻寇劫虜良民署指揮僉事田眞率兵於大藤峽等處前後斬首九十六級

宣德十年正月癸酉免正旦賀禮 甲戌敕行在工部及南京守備李隆等凡各處採辦買辦並營造物料皆停軍夫工匠人等當放者皆放回差去一應內外官員人等即便回京敕魏源及各都布按巡按御史亦如之 敕巫凱及遼東都司凡採捕造船運糧等事皆停罷差去內外官員人等俱令回京宜用心撫恤軍士備禦封疆 乙亥上崩 己卯百官軍民老耆人等奉箋於太子勸進 壬午即位頒詔赦天下自宣德十年正月初一以前遞年虧欠農商諸色課程戶口鹽糧鈔及歲造拖欠並追賠緞疋紗羅紬絹等項例死馬駝驢騾牛羊虧欠孳性等畜及未納各項贓罰冒官關鈔偷盜官糧等項及中鹽罰納鈔貫賠追未完緞疋等項盡行

蠲免 一民間遇有事故拋荒田土即從實取勘開報除豁稅糧  
另行召人承佃如係官田即照民田起科 敕沿邊宣府等處總  
兵譚廣等曰比聞北虜阿魯台部落來降者言虜聚兵進寨意在  
犯邊宜嚴卒乘謹兵墩 乙卯劉廣奏哈密忠順王卜答失里遣  
使臣來報猛哥不花等衆欲來剽掠沙州等處勅廣戒飭沿邊諸  
將嚴兵備禦及禮遣其使臣歸國其撒馬兒罕使臣久處甘州者  
并與敦遣仍加訪察毋令私挾我人口出境 丙戌朝鮮遣申概  
奉表貢賀 火把等族土官千戶男只巴蕭者番僧領占的等俱  
來朝貢 駙馬都尉李銘卒 蹇義卒 己丑迤北達子搶阿孫  
川卜族火兒藏刺麻加尾星吉等來歸貢馬 琉球中山王遣通  
事李敬四川石柱宣撫司土官遣把事尙添林并嘉河等衛指揮  
僉事革秃等俱來朝貢馬 哈利帖木兒等率男婦一十三口來  
降 勅浙江鎮守內官張達回京 減貴州屯糧三分之一 壬

辰上諡曰章皇帝廟號宣宗 迤北使臣脫合赤等來朝貢馬

陝西西寧河州洮州番族輸馬一萬三千餘匹給茶一百九萬餘斤 陳懷冠帶閑住 減無爲州采辦南京養象蘆根茭草 阿

魯台部下三百餘人來降及邊人當陷虜地一百二十餘人復歸

丁酉朝鮮遣李益精貢賀 帖列山等衛頭目撒德加泰寧等

衛指揮僉事不花毛憐衛指揮同知兀罕住等來朝貢馬 辛丑

戶部尙書黃福參贊南京機務 監察御史王翱行在右僉都御

史同都督僉事武興鎮守江西 都督僉事毛翔副都御史賈諒

鎮守湖廣 都督僉事韓億戶部侍郎王佑鎮守河南都督同知

李斌戶部侍郎李郁鎮守山東 壬寅上太皇太后皇太后尊號

宋瑛掌行在前軍都督府事 發遣陝西邊衛官軍操備京師

者各還原衛

二月癸卯遣指揮丁全齋敕諭阿魯台男昂克孛羅及大小頭目

遣郎中李納齎敕諭朝鮮 甘州回回指揮母撒及卓祿番僧官  
卓舍嚴等來朝貢馬 甲辰命興安伯徐亨都指揮同知韓鎮等  
鎮守永寧等衛兼提督沿邊關隘 乙巳命監察御史給事中巡  
視邊關 丁未復給通州左右神武中定邊四衛在京操備旂軍  
行糧 楊士奇等言近聞河南強盜三十餘起行劫宜招撫并勅  
鎮守巡撫如滋蔓即遣將率官軍勦捕 陝西都指揮僉事劉永  
鎮河州 毛憐衛都督撒滿失里建州衛都指揮李滿住等遣使  
奏忽刺温境內野人那列禿等率衆至那顏寨劫掠救那列禿即  
將擄去人馬財物如數發還 庚戌遣指揮王息齋敕往諭都指  
揮安出等如阿卜只俺妻子果在爾處即付息等領回 達賊入  
涼州衛東南爬沙馬牙山擄去本府牧放人畜 辛亥冊弟祁銓  
爲邸王平陽王美圭爲晉王保寧王悅燹爲蜀王 寇入磁州肆  
焚掠 行在僉都御史李濬憂去 壬子賜在京文武羣臣及軍

民人等白金絹布鈔錠 升沐晟爲右都督 命建州左衛故指揮僉事管秃姪那火赤襲職 甲寅賜鎮守守備內外文武官白金綵幣 涼州等衛回回指揮男罕馬力丁女真舍人剗刺秃等四川播州宣慰司貴州新化蠻夷長官司俱遣人來朝貢 行在五軍都督府言在京七十七衛官軍士校尉總額二十五萬三千八百餘除屯田守城外其十一萬六千四百俱內府各監局及在外差用今各營操練僅五萬六千選用不敷況今工部人匠數多足任役使乞將各監局侵佔官軍退回各營從之 戊午黃福升少保 升山雲右都督史昭劉廣王貴巫凱王貞蕭授李謙俱爲都督司知 衛青許亨李遠俱爲都督僉事以久控邊陲克箸勞績 升朶兒只爲都指揮同知 修築大同垣牆 己未巡按陝西御史曹翼言虜九月犯涼州十一月又侵莊浪比捕生虜言朶只伯將深入爲寇敕劉廣等嚴謹防禦 山東軍士麥米暫依舊

制全給 辛酉命朱勇李玉提督大營五軍三千等營官軍操練  
山西布政司庫所收布帛準折鎮西諸衛官未給俸糧 丙寅  
雲南鎮南州土官段節龍州把事李祥石柱宣撫司土官舍人冉  
才雄隆覺寺刺麻僧遠丹藏卜等來朝貢馬 丁卯省行在禮部  
諸衙門等冗費欽天監歷日太醫院藥材光祿寺糖密果品皆減  
省廚役六千四百餘名減選老疾者放回湖廣江西新芽茶七千  
五百餘斤省爲四千斤在京各寺法王國師刺麻六百九十餘名  
減數存留餘者令回原寺住坐放回雲南呵吒力朶兮薄五十餘  
名取回木邦等處催辦金銀內官革會同館辦事官南北監生入  
監年淺者放回自正統元年爲始府學一年一貢州學二年一貢  
縣學三年一貢上皆從其議 革上林苑監所轄冰鑑川衡典察  
左右前後六署 己巳行在戶部言在京牛羊等房借用浩繁命  
減去各房牛三千餘隻羊二千餘隻及歲貢絲綿硃茶等物俱減

其半

三月癸酉放朝鮮國婦女金黑等五十三人還其國金黑等自宣德初年取來久留京師 中都留守司奏近例旂軍月米一石止給六斗或四斗餘皆折鈔今懷遠諸衛連年亢旱缺食者多請仍全支行在戶部議宜暫從所請俟夏麥既登仍如近例上是其言後遼東江西諸衛亦有是請皆暫從之 行在兵部奏南直隸州縣孳牧黃牛七萬餘隻每歲光祿寺選用不過三千芻養既久時有倒死復令賠償民甚病之請留三萬隻孳牧其餘給與直隸軍民貧難者牧養耕用從之 戊寅劉廣奏虜酋朵兒只伯等遣脫火赤等三人來言朵兒只伯等率衆三千元在也可林察兒丹地面食盡乞降敕廣等遣人察其動靜廣復奏去年九月虜犯我邊境生擒其甥卜魯罕虎里虜欲索其甥故假以降附爲名況今見在爬沙一帶鈔畧其情 見乞勿許從之 巡按江西御史程富江

西布政使陳智等奏永豐新淦樂安等縣民曾子良等聚衆據大盤山劫殺敕武興王翱等招撫不服即調軍勦捕 放教坊司樂工三千八百餘人爲民 己卯賜永和王交城祁二縣地八十八頃有奇 罷浙江水寨海船守備 庚辰行在兵部言鎮守甘肅沿邊涼州等七衛地方相去一千八百餘里虜寇出沒殆無虛月涼州東鐵門關外有朵兒只伯鎮夷之北亦集乃路有阿端只肅州之西徼外有猛哥不花爲邊境患軍士缺馬騎操行在兵部議發陝西見儲官布於軍民之家市馬給之 辛巳行在兵部武庫司郎中徐晞爲本部試右侍郎浙江按察副使陳鎰爲行在都察院右副都御史 山西道監察御史羅亨信行在都察院右僉都御史 發山西官軍在京操備者悉還原衛 止營建山陵起取河南人夫 癸未減順天府所僉天財庫諸處夫役府尹李庸奏所屬人民乏遷移者衆 温州府平陽縣採辦銀課如青田等縣

例優免雜役軍需 甲申減行在光祿寺歲用粳米三萬一千石  
糯米一萬一千石粟米四萬餘石粟稻穀一萬一百石 乙酉安  
南遣黎柄等滿刺加國王西哩麻哈刺者遣其弟刺殿把刺哈密  
忠順王卜答失里遣使臣哈來思俱來貢駝馬方物器皿 戶部  
奏龍江瓦屑二壩歲積柴薪量存供用外餘皆易鈔入官 丙戌  
升毛憐衛指揮使王朶羅等二人爲都指揮僉事 兀罕住卜良  
吉等八十六人張襲爲指揮千百戶 丁亥免西寧衛土民雜差  
以土民有來訴者也 戊子敕諭阿速江等衛野人頭目弗答哈  
等責還原虜建州左衛人馬財物先是建州左衛都督僉事凡察  
奏被阿速河等衛殺其兄猛哥帖木兒等并掠去人馬財物請兵  
勦捕宣宗謂兵部臣曰蠻夷仇殺習俗則然不必動兵但遣使齎  
敕往諭俾還所掠使回未報至是上復有是命 顧佐等奏陝西  
洮岷官軍俱缺俸糧甘泉運站亦乏軍甲巡按御史熊翼等欲將

輕重罪囚除非眞犯罪者非文武官重罪待報者其餘一遵舊例  
納米擺站議暫允翼等所請從之 己丑故安順侯薛貴弟可  
帖木兒爲京衛世襲指揮使 辛卯胡濙九年考滿敕獎諭 羅  
汝敬奏先有涼州住坐土番叛於大鐵門關南一堵山潛住歲久  
窺伺邊境乞將臨洮等四衛官軍操備甘州者選將臣統領同都  
指揮包勝於涼州鎮番等處守備 壬辰升建州衛指揮歡赤忽  
等都指揮僉事 程富奏官軍民壯至大盤山下生擒嚴李茂等  
曾子良爲亂軍所殺子良僞稱永順王衆至三萬餘 各處倉厩  
但有小麥在倉毋拘挨陳之例 丙申以太原縣古城田六十餘  
頃賜寧化王濟煥 丁酉逮山西都指揮僉事呂整曹儉奏整安  
殺邀功 胡濙等奏四夷使臣動以百數沿途疲於供給宜敕都  
布按三司繼今審其來者量遣正副使從人一二十人赴京餘悉  
留彼處如例給待庶免往復供送之費從之 西寧西納隆奔卜

唾申藏革唾章唾巴哇六族告去歲荒歉給谷種三百石 戊戌  
大理府鄧川州土官知州阿永忠等貴州新化府赤溪南洞等長  
官司土官長官楊福等各遣人來朝貢馬 命興安伯徐亨備禦  
永寧 己亥妖賊班興等伏誅初興等師事張普祥刻期集衆爲  
亂其黨彭舉爲廣平府所獲興等欲謀殺府官未發事露悉就擒  
誅之

四月壬寅敕廣東都司布政司厚具廩餼駕八大櫓船送滿刺加王  
還國并遣古里真臘等十一國使附載同回 癸卯命蘇門答刺  
國宰奴里阿必丁男阿不賽亦的嗣爲國王 減差行人往四川  
陝西禁納私茶 乙巳朝鮮遣盧罔等貢馬及方物 陝西西寧  
衛巴哇族善智禪師鎖南割故命指刺竹爲頭目代其任 豁陝  
西金州新增茶課一十六萬四千餘斤 雲南雲南縣土官縣丞  
楊宗酉陽宣撫司遣土人劉得昌并毛憐等衛都指揮僉事撒滿

答失里來朝貢馬及方物 壬子給鎮守永平山海總兵官都督  
僉事陳敬關防 乙卯金筑安撫司上馬橋等長官司楚雄府左  
能寨長官司蒙自縣各遣人貢馬賜綵幣有差 更定在京韃官  
月俸給米例全給者減半 半給者給十之三四新降附自指揮  
而下亦遞減之 己未羅汝敬妄引詔書擅自復職逮行在吏部  
侍郎黃宗載鄭誠等下獄 辛酉方政佩征西前將軍印充總兵  
官曹儉爲都督僉事充左副總兵山西行都司都指揮使羅文爲  
都督僉事充右副總兵鎮守大同所統官軍悉聽節制 起李安  
爲都督僉事往甘肅同劉廣操備 召毛翔還京 命鎮守江西  
僉事武興往淮安同督漕運 造江米巷石橋 陝西西安等八  
府歲旱該征穀草一百四十七萬九千餘束宜準折鈔每束四貫  
從之 哨備開平官軍行糧就於獨石順齋 大監阮堯民都指  
揮劉清等有罪下獄初堯民同清等督兵造船於松花江并捕海

青因與女真市輒殺傷其人女真銜之堯民等徵回京女真集部落沿途攻截騎卒死亡八九百人巫凱以聞械堯民等下獄從之  
壬戌吳澄從祀 蕭授佩征蠻 將軍印都指揮同知吳亮都督僉事充副總兵 安定衛安定王哈密忠義王遣人並撒馬兒罕地面頭目來朝貢馬 癸亥四川別思阿容等寨首多兒者普志安順州土官遣人來朝貢馬 丁卯勅吏部都察院考察在外府州縣官 敕刑部都察院大理寺恤刑 行在刑科掌印給事中年富言自永樂以來招納醜類縻以官爵雜處京都坐費國用乞敕大臣參酌成規遣還故土命部詳議行之

五月壬申命兵部右侍郎徐琦工部左侍郎鄭辰刑部右侍郎吾紳行在通政司左通政周銓并巡撫山西于謙鎮守河南王佐山東李郁陝西陳鑑浙江成均江西王翱巡撫湖廣吳 考察南北直隸府州縣及布政司堂上官 甲戌署工部右侍郎知府張順兼

署兵部事 宥黃宗載鄭誠復職 乙亥設松潘指揮使司醫學

大理府陰陽學置醫學正科陰陽正術各一 行在兵部奏廣寧

開原二處所市馬匹上等送京師中等下等給軍士充戰馬其不

中者給屯種軍餘牧養種馬送遼東苑馬寺從之 巴縣官地茶

起課如民地茶例 丙子減除南京歲費省內官監禾秫穀草供

用庫麻米茶蠟御馬監豆粟穀草凡十二萬三千有奇光祿寺酒

籩麻索木檐人夫盡行革罷 戊寅命巡按陝西御史兼理屯田

以甘州等衛指揮仇勝等阻撓屯田佔據水利逋負餘糧 庚寅

革兩京都察院交趾道并戶部刑部交趾司 辛巳升毛憐衛都

督僉事撒滿答失里爲都督同知 建州衛都督僉事木答兀爲

指揮同知以招諭遠夷功 壬午減除蘇常等府州縣全家充軍

并絕戶拋荒官民田地俱準民田起科及古額官田共稅糧二百

七十七萬七千三百餘石 曹儉奏虜寇入境至樺皮溝殺死官

軍掠去馬驢 遣監察御史給事中十四人點視邊軍 甲申命  
故靖安侯王忠姪斌爲京衛世襲指揮僉事 戊子行在戶部奏  
兩淮鹽價低賤客商中納者少皆因彼處軍衛勢豪之家縱容廝  
役私出興販乞差監察御史一員往揚州府通州狼山等處提督  
軍衛巡司緝捕從之仍命御史準巡更例歲一更代 浙江仙居  
等縣強賊出沒劫居民殺捕盜指揮鄭宣李宣等 己丑宣宗陵  
號景陵 行在鴻臚左少卿張隆奏遼陽開原二衛歲費不貲欲  
召商開中鹽糧以積邊儲命行在戶部定例以行於是定淮浙蘆  
鹽每引四斗五升山東河南福建四川每引二斗仍不拘貲序給  
之 革陝西行都司莊浪衛大通山口鎮羌及永昌衛水磨川三  
驛 設四川別恩寨安撫司松潘長寧安撫司阿容族長官司吏  
目各一成都府威州保子關巡檢司巡檢一 癸巳行在戶部奏  
河東現儲鹽兩淮浙鹽少客商守支歲久欲以河東鹽量加其數

支與從之 乙未命被災之處富人田租一例減免 行在兵部員外郎言祥符時和二遞運所宜存時和一所自磁州至閩鄉協助驛夫亦發回原衛爲便從之 己亥敕西寧指揮穆寧及所屬番民三年一貢特緩待正統三年一併交收 罷文明惠河間官吏 減文明至通州六閘夫 庚子胡濙等言永樂中所納西北二虜授官在京乃朝廷一視同仁之心懷柔遠人之法命如議勿遣

六月辛丑禮部進宣宗出葬儀注 命陳懋佩平羌將軍印充總兵官劉廣充左副總兵李安充右副總兵兵部試右侍郎徐晞參贊軍務鎮守甘肅 癸卯給鎮守陝西行都司地方內官關防 太倉鎮海蘇州等衛軍人月糧照舊關支一石 虜騎入大同境肆掠官軍死者十五人傷者百餘人 甲辰升左軍都督府僉事吳也兒克等爲都督同知 免彰德府逃民復業稅糧 戊申召巡

撫浙江戶部左侍郎成均還理部事升行在戶部郎中王儻爲戶部右侍郎巡撫浙江 己酉雲南景東府頭目陶暹等朶顏衛指揮同知哈喇哈孫并哈刺陳指揮僉事苦列兒俱遣人來朝貢馬四川威州徙治威州千戶所城東州舊治鳳坪里 巫凱奏兀良哈福餘犯邊掠人畜守邊都指揮裴俊王祥佟勝不備禦命各罰俸半年 乙卯諭福餘衛都指揮安出等曰爾等縱部屬指揮頭目阿光土魁反卜兒等屢至邊境剽竊馬牛殺傷軍卒邊將屢請加兵朕不允所請特遣使齎敕往諭其拘各人悉追所掠之物送還遼東 丙辰韃子打刺帖木兒來歸 戊午遣使齎諭建州等衛都指揮李滿住巫凱奏爾遣指揮黃啟奴兒等齎文來言乞取回東寧衛復業各寨人口具見爾之忠誠敕至即遣人送回原衛復業 辛酉葬景陵 占城國遣使逋沙帕茹該等奉金葉表文及方物來貢 甲子宣宗神主還京 己巳升建州衛指揮同

知李張家爲指揮從凡察請 給西安左前後三衛潼關衛軍器  
給密雲中衛後衛官軍往古北口防邊弓箭盔甲刀鎗等件一  
萬五千有餘 劉廣奏韃賊屢犯邊境守備山丹署都指揮劉禮  
等殺死韃賊擒獲人馬弓矢等物

七月庚午劉廣奏近差指揮把台等齎敕往賜沙州衛都督因即來  
等禮幣並送回哈密瓦刺順寧王脫歡等處使臣道經赤斤罕東  
等衛被番達賊寇劫掠綵幣馬駝器械請發兵往勦敕諭頭目令  
追獲原擄諸物給與使臣護送出境 戶部擬松潘軍驗口支給  
小河疊溪威茂二州四衛馬軍一石步軍有妻小者七斗無者五  
斗從之 壬申設景陵祠祭署置奉祀祀丞各一 甲戌起復岷  
州衛經歷許疊仍舊任疊丁父憂去職王居羅仲海等一百四十  
六人生員劉牧等百三人各保疊滋事公勤修舉學校民甚懷之  
乞仍留任事巡撫官以聞上以岷州僻處邊陲特從所請 乙亥

升罕東衛指揮使班麻恩詰爲都指揮僉事正千戶監藏副千戶  
可兒即俱爲指揮僉事從班麻恩結奏 升曲先衛指揮那罕爲  
都指揮僉事卜答忽答即于撒兒者拜干都哥等八十九人俱授  
指揮千百戶有差從都指揮同知都立等奏 遣瓜哇國使臣從  
人哈災等還永樂中隨使臣馬嘿占入貢 丙子修宣宗實錄張  
輔監修楊士奇楊榮楊溥少詹事王英王直總裁 選順聖川孳  
生馬駒良者四五百匹送京調習 鎮守永平等處總兵官陳敬  
有疾回京都督同知王彧充總兵官 戊寅遼東都指揮僉事鄒  
溶爲都指揮同知 寧遠衛指揮季眞爲都指揮僉事 廣寧衛  
指揮同知陳慶指揮僉事陳麒葉興李通王祐復州衛僉事余敬  
俱升都指揮僉事分守開原及廣寧各衛 劉廣奏山丹衛韃賊  
入境劫掠 命駙馬都尉趙輝平江伯陳佐往南北二太僕寺印  
記馬七萬八千餘匹 己卯行在雲南道監察御史包德輝河南

按察使 四川道監察王文陝西按察使 江西按察副使石璞

本司按察使 廣東按察僉事龔燧四川按察使 廣信府知府

吳潤雲南按察使 庚辰敕譚廣等來降達子言說瓦剌脫歡并

兀良哈三衛人馬欲來尋阿台王子必是假此爲名來侵邊境即

整軍馬嚴督巡哨 以宛平縣草場地四十餘頃給與都督阿卜

只俺等爲牧放之所 巫凱奏先差土官千戶劉與等齎敕往海

西責還原虜松花江軍餘馬匹器械等物與還言其族類尙多猝

難徧歷上復降敕曉諭二十九姓番人仍戒凱慎遣齎敕人員毋

起邊釁 辛巳于謙言各處逃民見蒙招撫回還乞蠲免稅糧一

年差役二年大同守衛將帥及都司等官皆有莊田私役軍人播

種乞行取勘將田地撥與軍士屯種軍還原伍當差且大同地方

廣關宜專差一員巡按 壬午召鎮守河南侍郎王佐回京敕巡

撫侍郎于謙兼理 發民匠在逃充軍者仍爲民匠減武功三衛

原設軍匠十千戶所爲五千戶所 宥達官指揮使吳信怯列帖木兒罪 行在兵部奏軍士歲給布絮爲冬衣官旂往往侵扣請自今在京遣監察御史給事中在外令巡按御史等官會同戶部官給之命永爲例 丁亥增給大同軍士月糧有妻小者八斗無者六斗調至操備者五斗 胡濙等奏今京寺諸禪師法王國師番僧尙有四五百人其供費浩繁宜量留餘悉遣回本土上令俟來歲議行 己丑嚴私下海捕魚禁有奏恐引倭寇登岸 辛卯泰寧衛指揮僉事苦列台和寧王孫妻速木答里遣千戶把禿俱來朝貢馬 壬辰益大同備禦兵一千員名 癸巳楊士奇等言遼東屢報達賊入境宜於在京操備官軍內選精銳二千人委都督曹義領去分守地方大同宣府附近衛分選撥二千人給馬一千匹往聽鎮守總兵調用從之 甲午馬昇奏達賊侵掠龍門乙未羅汝敬戍赤城 丙申升開平衛指揮僉事楊洪爲指揮使

以禦虜有功 設雲南景東府保甸巡檢司置巡檢一 播州宣  
慰司天全六番招討使來朝貢 加楊洪游擊將軍仍於開平獨  
石等處選官軍二千餘騎付洪領之 戊戌升吳中少保仍兼尙  
書 陝西右參政王士嘉行在禮部右侍郎 順天府尹李庸行  
在工部左侍郎兼掌府事 温州府知府何淵行在刑部左侍郎  
武昌府知府邵旻行在工部右侍郎 江西建昌府知府陳鼎  
行在右副都 四川按察副使朱興言都察院左副都 福建按  
察僉事魯穆行在右僉都 行在刑部左侍郎魏源右侍郎施禮  
本部尙書 行在吏部右侍郎黃宗載戶部右侍郎王佐禮部右  
侍郎章廠兵部右侍郎柴車刑部右侍郎吳廷用俱爲左侍郎廷  
用調禮部左僉都吳納本院左副都 行在右副都陳勉大理卿  
巡關監察御史王祐奏山海沿邊操備官軍月糧俱於林南倉  
開支相去二三百里不勝艱苦命行在戶部議於遵化倉召商納

米中鹽以便官軍淮浙長蘆鹽每引米五斗山東河東福建四川每引二斗俱不拘資序給之

八月庚子賞赤城巡哨官軍官銀二兩軍一兩紅綠綿布二疋 巫凱奏闕神銃等器併各驛遞鋪舍相遠難於齎運上以遼東極邊軍器不可少闕驛遞既遠人力何堪命速治之 癸卯廣東按察僉事趙禮奏乞依欽定額設僧人府四十名州三十縣二十就於本寺量撥田畝聽其自種自食餘田均撥有丁無田之人耕種納糧命如所言行之 丙午減光祿寺廚役四千七百餘名增宣府軍士月糧 鎮守河州陝西都指揮僉事劉永奏本處所選土軍土民缺馬騎操今停止下番官買犏牛一千六百餘隻欲令每牛增茶七十斤易馬一匹給之行在戶部覆奏以牛易馬足相抵直不必增茶命每疋聽增茶三十斤易之 巫凱言邊情軍士冬衣布花請如洪武中例全給之官軍奉糧每石折鈔十五貫請量益

其數軍官口糧馬匹豆料請依舊例口糧月給五斗豆料月給四升又通州左右定邊薊州永平山海隆慶涿鹿諸衛俱在遼東操備請依在京宣德十年例一體賞之 兀良哈三達子并海西野人女真等遠來朝貢近奉敕樽節只許三二人多不過二十人其餘從人悉留關外蒙恩既久一旦沮泥必生疑慮請悉聽來朝廣寧等衛倉鹽糧請敕該部量輕則例召商實邊皆從其請 刑部

左侍郎白勉卒

涪州人

庚戌行在戶部奏今命將出師征勦北

虜糧餉預宜籌畫口外宣府大同糧料請以彼處官庫收貯布絹糴買仍令山西將存留糧轉運備用懷來無糧之處令法司囚犯於通州備車轉運遼東糧令山東發登州粟海運以給從之 辛

亥命巡撫陝西李新兼理屯田 甲寅敕准王饒州府可建王國今冬擇日往居 改交趾歸順土官知府陳全勗爲彰德府通判

乙卯命刺麻簇克林巴爲清修翊善國師給銀印誥命 赤城

堡設倉納鹽糧以備緩急 雲南新興等七場及四川行都司密勒山場傍近盜起焚庫藏戕守者劫掠鉛礦令總兵三司捕誅之  
丁巳浙江左叅攻俞士悅言戶口食鹽紹興等七府今令納米乞照舊納鈔起運秋糧浙江每糧一石加耗七斗兌米之際官軍恃強或淋尖踢斛加倍指納或準折加耗低價勒取乞敕戶部今後各委正官監臨不許私兌 戊午中軍左都督阿卜只俺卒賜祭葬 己未薊州等處總兵官王彧奏擦崖子百戶孟山不嚴督軍瞭守致達賊至關殺傷軍人 庚申設江西泰和縣花石潭巡檢司以舟船停泊多被登劫 辛酉敕瓦剌順寧王脫歡使臣阿老丁奴溫帖木兒等爾等爲番達賊寇剽回肅州不能前進順寧王復差使臣知院昂克等從寧夏來京宜即往寧夏候昂克等歸途一同發遣爲便 各稅課司增收麻油等料 壬戌免赤城等堡新撥屯軍子粒 忻城縣賊劫掠鄉村 丙寅召商於赤城堡

哨馬營二處開中鹽糧 鎮守開平等處左參將馬昇山西右參  
議葉世寧逮下都察院獄

九月庚午給居庸等驛甲軍月糧以添設萬全都司衛所使客絡繹  
給宣府等處屯牛時調操軍二千八百人於宣府赤城雲州雕  
鶚屯田 免德勝關富戶原籍戶丁徭役 以齊化門外木廠曠  
地置花園草場隸後軍都督府除大使副使各一 乙亥鎮守洮  
州都督僉事李達奏軍士缺馬騎操請以原買下番犏牛五 隻  
易馬給軍從之 丙子行在戶部奏遼東甘肅備禦官員俸祿米  
鈔中半支給令在京軍官給米外餘米每二石折與生絹一疋在  
外軍官宜如京衛例從之 己卯調行在刑部尙書施禮爲刑部  
尙書行在吏部左侍郎黃宗載吏部尙書 大同左副總兵曹儉  
宥死降爲事官於甘肅立功 辛巳薊州永平各處上納京庫綿  
布量運五萬疋赴薊州收貯折作俸糧 壬午革重慶府南川等

四縣茶倉四縣茶課數少 甲寅廣東神電衛指揮僉事張演署  
都指揮僉事巡備雷廉等衛 己丑瓦剌順寧王脫歡等遣使臣  
月魯卜花等貢馬及貂鼠青鼠皮賜宴於禮部及賜綵幣等物有  
差 壬辰行在戶部奏衡州府倉糧六十四萬餘石欲令量在衡  
州衛官軍二年支用外餘令附近茶陵諸衛關作俸糧及散與衡  
州屬縣飢民俟秋成還官從之 行在兵科給事中朱純往萬全  
都司查理軍任還上便宜一獨石開平東連萑菜衝西接氈帽山  
南通貓兒峪北臨草野皆賊人出沒之所乞遣智勇頭目分領精  
兵往戍命該部議之 廷臣會議運糧官軍兌運各處民糧赴京  
者湖廣江西浙江每米一石加耗六斗南直五斗江北直隸四斗  
徐州三斗五升山東河南二斗五升 巡撫陝西李新奏今先於  
慶陽等府倉內轉運五十萬石於甘肅以西安等府稅糧補足其  
額從之 甲午行在鴻臚左少卿張隆奏沿邊人馬歲費糧料二

十二萬石有奇令軍民兼運 乙未升開平衛指揮使楊洪爲都指揮僉事以獲虜寇功

十月己亥于謙奏山西都司併行都司如萬全都司例官馬月支三升從之 庚子諭王冀等達賊阿台朶兒只伯屢犯邊境其榜諭勦賊立功升賞 壬寅遣使齎敕諭阿台王及朶兒只伯爾等不戢耳爲仇敵時復突入涼州鎮番境內朕不欲興兵殄滅爾能相率來歸休養如故永昌土達頭目長脫脫帖木兒等曾出爲寇今能效順亦許自新 減重獨石中納鹽糧每淮浙鹽一引納米豆三斗 西寧衛奏茶馬司缺茶買馬而成都等府積有官茶請召商於彼處運赴本司每茶百斤加耗十斤不拘資次支與淮浙鹽六引從之 徽州府糧八萬石折銀三萬二千兩轉發宣府大同依時直隸糶買糧料 甲辰給順天府外夷來降令鋪戶營辦雜用器皿價鈔二百八十七萬一千一百餘貫 己巳蔣貴奏松潘

東南二路關城木柵自蠻人作耗悉皆傾毀近已勦捕寧帖 丙午敕西寧所管阿台十三族番民內選精銳赴甘州協助勦賊

升姚琛陝西都指揮僉事往寧夏備禦調漢中潼關衛官軍二千守之 戊申行在戶部奏陝西邊衛缺糧召商中納於西寧莊浪納者每鹽一引麥米豆四斗甘涼肅納者每鹽一引米麥豆三斗

出京庫布於甘肅市馬 己酉謫山西行都司都指揮僉事鄧瑛等戍遼東 辛亥革廣東高要 清岐關 建天下衛所學校

癸丑日本國使臣中誓等來朝貢馬仍令齋敕及白金文錦歸賜其國太妃李賢掌行在中軍都督府事 甲寅署都督僉事李謙等備赤城 乙卯升遼東都指揮同知侯通爲都指揮使施聚焦禮爲都指揮同知崔祥劉順柏貴唐春夏禮俱爲都指揮僉事仍領軍操備 鎮守遼東太監亦失哈等奏朶顏三衛縱其部落數來擾邊敕諭三衛頭目嚴加約束 丙辰江西左參政郝珩陝

西左布政 河南按察副使王俊得廣東左布政 賜廣西思明  
府都指揮黃竑雲南阿迷州寄住故土官陶瓘等綵幣 發潼關  
衛官軍在京一千二百人置原衛 戊午置山西大同府草場大  
使一 改萬全都司保安衛倉爲保安州新興倉設大使副使各  
一 庚申朝鮮遣陪臣南智等奉表貢 赤城獨石雲州雕鸞哨  
馬營五城米豆俱缺命李賢督官軍運京倉米豆三萬石給之萬  
全都司衛所添設人馬歲費米豆七十餘萬石 甲子給留守諸  
衛守船軍士糧賞 乙丑四川乾藏寺灌頂弘慈妙濟國師遣番  
僧貢馬 木蘭衛女真指揮同知咬納弗提衛指揮火乞等奏事  
至京

十一月戊辰鎮守陝西都督同知鄭銘言借馬助邊竊見隆德地方  
草場楚府及黔國公牧放馬匹尙多宜借給從之 己巳敕巫凱  
比得太監亦失哈奏擬將原賜奴兒干物件停貯邊庫者給賞招

來夷人已從其言今爾等又言亦失哈復自備併假貸官下財帛  
充賞爾等但宜作士氣謹邊防餘事不許擅行 以運糧出口官  
軍苦寒人給袴二翰鞋一雙 庚午行在刑科給事中陳樞奏敕  
往遼東還言九事一遼東地方煙墩乞於地方要害處增設 一  
遞軍充軍囚人逃亡乞令兵部差人勾取 一禁約馬軍附帶官  
旂什物 一各處城堡軍士月糧乞令屯軍於秋成後運赴本處  
城堡以便支給 一自山海關至寧遠山木陰翳賊易藏伏乞將  
罪囚量輕重伐木 一納米中鹽乞量減升斗多招中納 一鹽  
商納米乞差官盤驗 一勾軍官旂嚴加比較 一巫凱曹義不  
務協和乞敕各官同心協慮以理邊務令該部計議以聞巫凱曹  
義降敕切責 辛未貴州故宣慰使安中男聚女真指揮苦亦不  
花來朝貢馬思明府姚州土官遣人貢馬 設餘干縣康山巡檢  
司進賢縣龍山巡檢司置巡檢各一 壬申妖賊緣旭林等伏誅

癸酉復遣敕諭海西各衛野人女真都指揮頭目人等令鈐束諸夷毋容造禍以遼東守臣累奏來擾邊 弗提衛都指揮僉事塔失都指揮使仍理衛事 兀者衛指揮使莽刺的各八哈答爲都指揮僉事 指揮同知阿里哥的別失里爲都指揮使 乙亥敕陳懋西寧阿台等十三族番民聞調心懷疑懼其撫諭令寧居 蠲西安所屬州縣送納永昌甘州等衛稅糧至涼州爲達賊剽掠稅糧 丁丑敕孟良府車里八百大甸軍民宣慰使司遣人送老撾使回抵本土務在慎護優禮 戊寅改馬營堡倉爲廣盈倉仍隸開平衛 王佐等奏會同鄭銘等措置甘肅涼州等處糧儲議得慶陽府倉現有收儲巡撫侍郎李新已關支糧三十萬石餽運路經蘭縣黃河迤北虜寇出沒不常乞敕總兵官差官軍沿途分委地方防護命行在兵部速移文如所擬行之 壬午賜西北沿邊將士白金等物 兵部左侍郎柴車往甘肅協同總兵整飭

邊備召徐晞回京 癸未命戶部郎中員外郎主事等官監收南京倉糧都察院奏南京諸衛倉六十餘處歲收糧一百六十餘萬石 甲申濬治金龍口 丙戌左通政周銓行在右副都御史總督南京糧儲 戊子瓊州府臨高縣故土官男倪通并思恩州土官岑瑛遣弟程來朝貢馬 己丑朝鮮遣李恩儉貢賀 壬辰朝鮮國王李禔奏建州衛都指揮李滿住等屢誘忽刺温夷人擾害邊境願行天討敕復之曰此小寇不足煩師遠征王宜自帥兵備以懼之 己未復書慶王旃送馬五百匹荷至意已敕總兵官祇領又得甘肅捷報勦殺虜寇殆盡遺孽遠遁可無患 丁酉調巡撫陝西李新巡撫大同宣府羅汝敬行在工部右侍郎仍巡撫陝西

十二月戊戌欽天監進宣德元年大統歷 命左都督阿卜只俺子脫脫孛羅吉爲錦衣衛帶俸指揮 己亥行在戶部員外郎羅通


奏萬全都司各衛所宣府各衛所軍馬歲用糧料六十四萬六千七百餘石本處支用不給乞召商出備車輛於宣德倉有糧之處運三萬石輸之赤城三萬石輸之哨馬營一萬石輸之獨石爲便令該部議行 定中鹽運糧則例赤城堡中淮浙長蘆鹽每引一石四川福建山東河東鹽每引四斗七升獨石中淮浙長蘆鹽每引九斗四川福建山東河東鹽每引四斗五斗皆不拘資序支給妖賊張普祥伏誅普祥真定衛軍以妖書惑衆潛居井陘縣自號七佛祖師遣其黨往河南山東西直隸等處度人約先取彰德城以次攻奪諸城其黨李名等百餘人入磁州焚千戶所官軍攻敗之普祥挈家屬竄伏柏鄉縣遞運大使魏景原引官軍至其黨土洞內獲之械送京師命廷臣鞫實誅之以擒賊功升錦衣衛指揮僉事劉源爲指揮同知監察御史韓偉真定府通判杜棠柏鄉縣知縣劉宗等升賞有差 壬寅命楊士奇楊榮楊溥輪議建

言事件 癸卯敕方政等遣達賊入境虜掠人畜來不能禦去不  
敢追割民養兵將何所用敕至即將失機守瞭官軍如律究治爾  
等姑從寬貸 丁未命四川天全六番招討使故招討使高敬讓  
子鳳署天全六番招討司事敬讓爲事下獄死鳳乞襲父職上念  
其祖有安撫夷人之功故命之 行在右僉都御史李濬巡撫遼  
東先是行在戶部兵部奏遼東等處地方廣遠宜得大臣巡撫上  
命廷臣推舉至是舉濬以聞 戊申方政奏大同右衛百戶李智  
將虜中走回軍丁馬祥匿而不報上命如律治之 己酉遼東三  
萬衛千戶楊滿高等四川八郎等安撫司土官俱遣人來朝貢馬  
庚戌吳政言湖廣左布政使李旭昏耄庸惰黜之 辛亥免甘  
肅士民雜差 壬子浙江嚴州台州二府各奏屬縣歲辦弓箭弦  
翎數多民實不堪減三分之二 蔣貴奏比因番人作耗松潘疊  
溪諸處倉糧支銷殆盡別無儲積命行在戶部於四川歲運之數

量益二分以給之 陳懋奏官軍連敗阿台朶兒只伯賊衆於黑  
山等處生擒斬首二百六十餘人獲馬駝牛羊驢騾三萬五千有  
餘追回被掠男婦悉還其家上慮賊衆旣敗或於他處入救大同  
等處沿邊諸將嚴督備禦 陳懋奏甘肅時有達賊入境原操備  
軍士調用不敷乞於陝西行都司所屬十三衛所屯守軍士內選  
精壯者相兼哨備從之 癸丑沙州衛都督因即來爲哈密所侵  
率所部二百餘帳來附邊且陳被侵飢窘之狀命邊臣撫按量與  
米麥賑之 丙辰雲南臨安府寧州土官祿慶木里吉河等衛女  
真指揮打刺哈等來朝

宣德別錄卷二

101/0003/



A large rectangular area with vertical lines, serving as a template for writing or recording information.

中華民國二十九年九月廿日




百城堂書店	
冊數	2
定價	1200-

國家圖書館



001709624



線

654.633

8896

v. 2

舊籍